

Ya Mangêd ya Habi tungkol kan Apo Jesu-Cristo ya inhulat ni Marcos

Paunan habi

Ya Mangêd ya Habi tungkol kan Apo Jesu-Cristo ya inhulat ni Marcos ay nag-umpisa hên êmên di, “Ya laman hên hata hulat, ay yabay ya Mangêd ya Habi tungkol kan Apo Jesu-Cristo, ya Anak ni Apo Namalyari.” An-ipahlék êt bayri ya ubat kan Apo Namalyari ya kapangyarihan ni Apo Jesu-Cristo. Mahêlêk ya habayto ha pamanoro na, ha pamanambut na kanlan Satanas, haka ha pamatawad nan kasalanan lan ampaghêhê. An-habién na êt di ni Panginoon Jesus ya tungkol ha sarili na ya hiya, ya Taga-Langit, ya In-anak Tawo, ay atsi bayri ha luta, para idin nay lawini na, ta êmên iligtas ha ayn anggay parusa ya hilay ampaghêhê.

An-ipamwang ni Marcos ya kapangyarihan ni Apo Jesus ya mahêlêk ha kapapaêpapah ya dinyag ná.

Ya katganan hên hata hulat (16:9-20) ay ayn ha kaatag ya hulat ya Griego. Kabay anhabién lan kaatag ya alwan hi Marcos ya main hulat hên hata tawlin habi di ha 16:9-20.

Kabooan hên pinakalaman

Ya umpisa hên Mangêd ya Habi 1:1-13

Ya dinyag ni Apo Jesus ha probinsyan Galilea 1:14-9:50

Ya dinyag ni Apo Jesus ya umpisa ha Galilea angga ha Jerusalem 10:1-52

Ya tawlin parominggo hēn biyay ni Apo Jesus
 11:1-15:47
 Hi Apo Jesus ay nabiyyay oman 16:1-8
 Ya pagpahlēk ni Apo Jesus hēn hiya ay nabiyyay
 oman, haka ya pamag-orong na ha langit
 16:9-20

Ya panoro ni Juan Bautista
(Mateo 3:1-12; Lucas 3:1-18; Juan 1:19-28)

¹ Ya laman hēn hata hulat, ay yabay ya Mangēd
 ya Habi tungkol kan Apo Jesu-Cristo, ya Anak ni
 Apo Namalyari.

² Habaytsi ay nag-umpisa hēn nanupad hēn hu-
 lat lan mámpamwang hēn an-ipaihip kanla* ni Apo
 Namalyari, ya wanana Kahulatan,
 “Iutoh ko ya mihay muna kamo, ya mangil-an hēn
 danan mo.

³ Hiyay ampan-angaw ha logal ya kabalah-
 balahan, ya wana kanlan kal-atan ya naka-
 tsipon,

‘Il-an yoy nakêm yo ha pamanlumatêng hēn Pangi-
 noon,

Ya nanad ha pamil-an hēn dann ha
 pamanlumatêng hēn mihay matag-ay ya
 manungkulani.’”

⁴ Natupad ya habayto hēn nakalatêng hi Juan
 Bautista hēn namipamwang kanlan dinumani
 kana ha Illog Jordan, ha logal ya kabalah-balahan,
 ya dapat lan paghêhêan hēn talibatokan ya pa-
 manyag kasalanan, bayo dapat pabawtismo hila,
 haka patawarêh hila bayto ni Apo Namalyari.

* **1:2** propeta.

5 Kal-atan lan taga-Jerusalem, haka kaatag pon ya legal ha probinsyan Judea, ay dinumani kan Juan. Inamin haka inhuko lay kasalanan la, bayo nagpabawtismo hila kana ha Ilog Jordan.

6 Hi Juan ay nakatakop hēn dyag ha habot hēn kamelyo, haka ya tagkēh na ay dyag ha balat. Ya angkēnaēn na ay doron haka main bayron pulot panilan ya an-inêmēn na.

7 Panay nan an-ipamwang ya êmēn di, “Ya lumatêng ya Mesias, ya Cristo, ya impangakon Mámiligtas ya pinili ni Apo Namalyari hēn mamaala, ay makapangyarihan kangko. Agyan mangokal hēn hêêl pag-apin bitsih na, ay ayn akon karapatan ta matag-ay ya tungkulon na.

8 Hikoy ampamawtismo kamoyu ha lanêm, noa, hiyay mamawtismo kamoyu ha Espiritu ni Apo Namalyari.”

Ya pamawtismo kan Apo Jesus

(Mateo 3:13-17; Lucas 3:21-22)

9 Hēn habayto, ay nilumatêng hi Apo Jesus, ya ubat ha balayan Nazaret ha probinsyan Galilea, ta nagpabawtismo ya kan Juan ha Ilog Jordan.

10 Hēn inumawah ya ha lanêm, ay nahêlêk ni Apo Jesus ya langit ya biglan nagloat, haka inumaypa kana ya Espiritu ni Apo Namalyari hēn nanad ha mihay pati-pati.

11 Haka main habi ya ubat ha langit, ya wana, “Hika ya panlugurên kon Anak ya ampamahigla kangko.”

Aya napatukso hi Apo Jesus hēn antuksoêñ ya ni Satanas, ya diyablo

(Mateo 4:1-11; Lucas 4:1-13)

12 Pangayari yan nagpabawtismo hi Apo Jesus, ha Ilog Jordan, ay tampol yan impabita hēn Espiritu ni Apo Namalyari ha legal ya kabalah-balahan.

13 Atsi ya bayro hēn apatapo ya allo, hēn antuksoēn ni Satanas, noa, a ya napatukso. Main bayron mangahilēb ya ayop ya kalamo na, noa, main anghel ya nipanawop kana.

Ya pamanagyat ni Apo Jesus ha apat ya unan nag-in tagahonol na

(*Mateo 4:12-22; Lucas 4:14-15; 5:1-11*)

14 Hēn nakakulung yay na hi Juan Bautista, ay nag-orong hi Apo Jesus ha probinsyan Galilea, ta impamwang na bayro ya Mangēd ya Habi ya ubat kan Apo Namalyari.

15 Impamwang na, ya wana, “Nilumatēng ya panaon ya intakda ni Apo Namalyari, haka marani ya pamanlokop na, kabay paghēhēan yon talibatokan ya pamanyag kasalanan, haka maniwala kaw ha Mangēd ya Habi!”

16 Ha pammita ni Apo Jesus ha laylay hēn Dagat-dagatan hēn Galilea, ay nahēlēk nay loway mikapotoh pohēl, ya magdadakēp hēn kēnan lanēm, ya hi Andres haka hi Simon, ya ambanhagan lan Pedro. Hila ay ampayhabwag hēn lambat ha lanēm, ta ampandakēp hila dayi hēn kēna.

17 Hinabi na kanla, “Makihonol kaw kangko, ta daygēn kataw hēn māmipakarani hēn tawo kangko, ta êmēn hila maniwala.”

18 Tampol lan imbalag ya lambat la, ta nakihonol hila kana.

19 Ha pammita lan Apo Jesus ha laylay hēn lanēm, ay nahēlēk na ya maának ni Zebedeo, ya hi

Santiago haka hi Juan ya ampamitoyo hēn lambat la, bayro ha bangka la.

20 Tampol nan hinagyat hi Santiago haka hi Juan hēn makihonol kana. Imbalag lay tatang la ha bangka hēn kalamoy pan-upaan la ha paman-dakēp kēnan lanêm, ta nakihonol hila etaman kan Apo Jesus hēn nanad kan Simon haka Andres.

*Pamipaplag ni Apo Jesus hēn narawak ya a angkahēlēk ya hinumapat ha mihay lalaki
(Lucas 4:31-37)*

21 Nilumatêng hilan Apo Jesus ha balayan Caper-naum. Ha allon pamagsimba, ay nanoro ya bayro ha sinagoga la.

22 Naubuh hilan nag-êpapah ha panoro na, gawan ya panoro na, ay nanad panoro hēn main tungkulon, alwan nanad ha panoro lan mánoron Kautuhan ni apo Moises.

23 Bayro ha sinagoga, ay main lalaki ya hinapatan hēn narawak ya a angkahēlēk. Nan-angaw ya hinumapat kana, ya wana,

24 “Jesus ya taga-Nazaret, hinoy ampakiêmênan mo kannaên? Labay mo kay hēn parusaan? Muwang ko no hino ka. Hika ya banal, ya ayn hinon kasalanan, ya in-utoh ni Apo Namalyari.”

25 Hēn nagilam ni Apo Jesus ya hinabi nan hinumapat kanan hatoy lalaki, ay hinabyanan na ya, haka na ya impaplag, ya wana, “Paan kan maglabak! Mag-alíh ka ha hinapatan mo!”

26 Intumba ya lalaki hēn hatoy hinumapat kana, haka na ya imbuwad-buwad, bayo nag-alíh ya kanan lalaki hēn ampan-angaw.

²⁷ Nag-êpapah hilay atsi bayro, ta nihahabi hila, ya wanla, “Hino ya magkatoroaan hên hatsi? Mi-hay bayoy toro lawêh! Nag tungkulon haka kapangyarihan ya pami-utoh nan paypaplag hên nangarawak ya a angkahêlêk ya hinumapat ha tawo.”

²⁸ Habaytoy dinyag ni Apo Jesus, ay tampol nibahwag ha boon probinsyan Galilea.

Namaalíh hi Apo Jesus hên hakit lan kal-atan ha bali lan Simon Pedro

(Mateo 8:14-17; Lucas 4:38-41)

²⁹ Pamakaawah ni Apo Jesus ha sinagoga, hên kalamo na hi Santiago, hi Juan, hi Simon Pedro haka hi Andres, ay nagpakha hila ha bali lan Simon haka Andres.

³⁰ Nalatngan lay ampo ni Simon, ha papag, hên main hadyay omot. Kabay pinikihabi la kan Apo Jesus ya paalihêن nay omot nan habaytoy bakêt, ya ampo ni Simon.

³¹ Dinumani hi Apo Jesus kana, tinalan nay gamêt, ta impaimata na ya, haka naalíh ya omot na. Bayo namakan ya kanlan Apo Jesus.

³² Hên ampinaboy nay allo, ay gintan la kan Apo Jesus ya nipaghakit, haka hilay hinapatan hên nangarawak ya a angkahêlêk.

³³ Nagtsipon ya boon balayan, ha ilwangan hên bali lan Simon.

³⁴ Namaalíh hi Apo Jesus hên hino-hino kay na hên ya hakit la, haka impaplag nay nangarawak ya a angkahêlêk ya hinumapat kanlan kaatag. A na hila pinaulayan hên maghabi, ya impaplag na, gawan muwang la, ya hiyay Anak ni Apo Namalyari.

Nanoro hi Apo Jesus kanlan Israelita ha kalatan sinagoga

(Lucas 4:42-44)

³⁵ Dali allo pon, ay nammita yay na hi Apo Jesus ha mihay legal ya marayo ha tawo, ta nanalangin ya.

³⁶ Noa, hilan Simon ay ampanapol kana.

³⁷ Hêñ natapol la ya, ay hinabi la kana, ya antapolêñ la yan kal-atan.

³⁸ Noa, wana kanla, “Lakwêñ tamo pon ya balyan di ha mamalibot ha legal ya habaytsi. Dapat ko etaman hêñ ipamwang kanla ya Mangêd ya Habi ya ubat kan Apo Namalyari. Kabay atsi ko di.”

³⁹ Nanoro yay na ha mal-at ya sinagoga lan Israelita ha boon probinsyan Galilea. Namipaplag ya hêñ nangarawak ya a angkahêlêk ya hinumapat hêñ namahakit kanlan atsi bayro.

Namaalih hi Apo Jesus hêñ hakit ketong ha mihay lalaki

(Mateo 8:1-4; Lucas 5:12-16)

⁴⁰ Minghan hêñ main kal-atan ya nangamat kan Apo Jesus, ay main dinumani kana, ya mihay lalaki ya nag hakit ketong. Nandoko ya ha arapan ni Apo Jesus, ta wanana nakiingalo, “Panginoon, no kalabayan mo, ay paalihêñ moy hakit ko, êmêñ luminis ya lawini ko.”

⁴¹ Naingalwan ya ni Apo Jesus, kabay impalunto ni Apo Jesus ya gamêt na kana, ta wana, “Labay kon paalihêñ ya hakit mo. Luminis ka!”

⁴² Tambêng naalih ya hakit na.

⁴³ Bayo in-utoh na ya ni Apo Jesus hêñ main panaad, ya wana,

44 “Paan mo pon ipamwang ya hatsi ha hinoman. Pakha ka ha pari ta ipahlék mo kana ya ayn kay nan ketong. Mantan kan maiparaya ha pamanhumonol mo ha utoh ni apo Moises,[†] êmén paptégan kanlan kaatag ya malinis kay na.”

45 Noa, hén nammitta ya, ay impamwang nay pamipaalíh ni Apo Jesus hén ketong na, kabay lalon nibahwag ya kapangyarihan ni Apo Jesus, haka gawan ha kal-atan ya mabay manggilam hén toro na, ay a yay na makahowén ha hinon balayan bayro, ta a na hila makwan matoroañ hén mangéd. Kabay napaidi ya tana ha marayo ha balayan, êmbayro man, ay nilako la yan kal-atan ubat ha ayri man ya legal.

2

Ya mihay a ampakabita, ya in-arap kan Apo Jesus

(Mateo 9:1-8; Lucas 5:17-26)

1 Hén nakalabah ya ungnoy allo, ay nag-orong hilan Apo Jesus ha balayan Capernaum. Ya pamalumaténg na bayro, ay nibahwag.

2 Kabay ni-tsi-tsipon ya kal-atan bayro, angga ha napno ya bali haka ayn nanan dyanan agyan ha arapan hén ilwangan. Kaban an-ipamwang kanla ni Apo Jesus ya habi ni Apo Namalyari, ay

3 main nilumaténg ya apat ya lalaki ya ampan-tan hén mihay lumpo ya atsi ha langkayan. Iarap la ya dayi kan Apo Jesus.

4 Noa, gawan ha kal-atan, ay ayn hilan madanan. Kabay nunik hila ha bubungan ta

[†] **1:44** Levítico 14:2-33.

nilubtan lay atêp ha dapit ugto ni Apo Jesus. In-antotoh lay lumpo ha pibonakan lan kal-atan ha arapan ni Apo Jesus.

⁵ Hêñ nahêlêk ni Apo Jesus ya paniwala la kana, ay hinabi na kanan lumpo, “Pakhawêñ moy nakêm mo, ta pinatawad ya kasalanan mo.”

⁶ Main bayro hêñ mánoron Kautuhan ni apo Moises, ya ampangihip hêñ êmên di,

⁷ “Hinoy hatsi ya an-ipantag nay sarili na kan Apo Namalyari hêñ mamatawad hêñ kasalanan? Yarin a nan ammusmusêñ hi Apo Namalyari ya tawo yan bêngat! Mimiha na ni Apo Namalyari ya makapatawad hêñ kasalanan.”

⁸ Tampol nan namwangan ni Apo Jesus ya laman ihip la. Kabay hinabi na kanla, “Pata ampangihip kaw hêñ êmbayro?

⁹ Hino awud ya maparah hêñ habiêñ kanan mihay a ampakabita, no habiêñ ko, ‘Napatawad kay na ha kasalanan mo,’ o no habiêñ ko, ‘Hali, mirêng ka ta mita kay na.’

¹⁰ Noa, êmên yo mamwangan ya hiko, ya Taga-Langit, ya In-anak Tawo, ay main tungkulon di ha luta hêñ mamatawad kasalanan, ay habiêñ ko kanan lumpo,

¹¹ ‘Mirêng ka. Hapwatêñ moy langkayan mo ta muli kay na.’ ”

¹² Tambêng yan nirêng ha arapan la ya hata lumpo. Hinapwat nay langkayan na, ta nuli ya. Naubuh hilan nag-êpapah ya atsi bayro, kabay pinuri la hi Apo Namalyari, ya wanla, “Amêhêñ allo ay nakahêlêk kitamo hêñ a tamo êt nahêlêk.”

*Hi Leviya ambaêgên êt Mateo, ya máningil buwih,
ay hinagyat ni Apo Jesus
(Mateo 9:9-13; Lucas 5:27-32)*

13 Bayo nag-orong yay na hi Apo Jesus ha laylay Dagat-dagatan hên Galilea. Pinakikamatkamatan yan kal-atan, kabay tinoroan na hila.

14 Pangayarin habayto, hên ampammita-bitaya, ay nakahêlêk yan mihay máningil buwih ya anak ni Alfeo, ya nag langan Levi, ya ampikno ha paningilan na. Hinabi ni Apo Jesus kana, ya wana, “Kihonol ka kangko.” Tampol ya etaman nakihonol kana.

15 Amêhêñ, hên atsi hilan Apo Jesus ha bali ni Levi hên ampangan, ay main nilumatêng ya kalatan maningil buwih, ya kapareho ni Levi, haka kaatag êt ya makasalanan, ya ampakihonol kan Apo Jesus, ya kalamo la hên nangan.

16 Hêñ nahêlêk lan ungnoy máñoron Kautuhan ni apo Moises, ya Pariseo, ya ampangan hi Apo Jesus hên kalamo lan máningil buwih, haka kaatag êt ya makasalanan, ay nangotang hila kanlan tagahonol ni Apo Jesus, ya wanla, “Pata ampangan ya hêñ kalamo lan máningil buwih haka kaatag êt ya makasalanan?”

17 Hêñ nagilam nay hinabi la, ay nangalimbawa hi Apo Jesus, ya wana, “Hilay main hakit, ay ampangailangan doktor, alwan hilay ayn hakit. Êmbayro êt, atsi ko di ha luta ta êmén ko mahagyat hilay ampangamin makasalanan hila, hêñ maghêhê hêñ manalibokot ha pamanyag lan kasalanan. Noa, hilay ampaghabin ayn hilan kasalanan, ay a ko hawpan.”

Pinakibatan ni Apo Jesus ya kotang tungkol ha pagtêeh hêñ a mangan ta êmêñ a maabala ya panalangin

(Mateo 9:14-17; Lucas 5:33-39)

18 Minghan hêñ nagtêeh hila hêñ a nangan, ta êmêñ a maabala ya panalangin la, ya tagahonol ni Juan Bautista haka hilay Pariseo, ay main ungro bayro ya naghabi kan Apo Jesus, ya wanla, “Hilay tagahonol ni Juan haka hilay tagahonol lan Pariseo, ay ampagtêeh hêñ a mangan, ta êmêñ a maabala ya panalangin la. Pata alwan êmbayro ya andaygêñ lan tagahonol mo?”

19 Kabay in-alimbawa ni Apo Jesus ya sarili na ha lalaki ya an-ikasal, ya wana, “Endat yon a mangan ya bisita hêñ lalaki ya an-ikasal, no kalamo la ya? Siguradon mangan hila!

20 Lumatêng ya allo ya ipakarayo ya lalaki ya an-ikasal, ay bayro hilay nan a mangan.”

21 Amêhêñ, intoro ni Apo Jesus ya a mailamo ya toro na, ha toro lan ninuno la, ya wana, “Ayn mamitagpi hêñ bayoy tela, ya a pon napipi, ha gihi hêñ manan takop. No alimbawa ta daygêñ nay habayto, ta pipiêñ nay na, ay kumpêh ya intakap, haka humlay ya gihi.

22 Ayn mamitungtug hêñ bayon alak ha ubatan hêñ manan alak gawan lumtoh ya pamyanan, haka mabullog ya alak.* Ya bayoy alak ay dapat itutugtug ha bayon pamyanan.”

* **2:22** Ya pamyanan la hêñ alak ay dyag ha balat kambing, kabay minghan lan bêngat magamit gawan angkumita.

Ya toro ni Apo Jesus tungkol ha allon pamagsimba

(*Mateo 12:1-8; Lucas 6:1-5*)

23 Mihay allon pamagsimba, hēn nipaydann hilan Apo Jesus ha nag trigo ya narani ha dann, ay nantē hilay tagahonol na hēn pērad. Kinētēb la kaban ampammita hila.

24 Noa, nag Pariseo bayro ya naghabi kan Apo Jesus, ya wanla, “Pata nantē hilay tagahonol mo hēn trigo ha allon pamagsimba, bawal man ya habayto ha Kautuhan tamo?”

25-26 Wana etaman ni Apo Jesus, “Kayno a yo pon nabaha ya dinyag ni Arin David hēn haton panaon, hēn hi Abiatar ay pinakapoon pari. Hēn habayto, hiya, haka hilay kalamo na ay angkablay hēn lonoh, kabay hinumwēn ya ha bali ni Apo Namalyari ta nangwa yan puto ya imparaēp kan Apo Namalyari ya pangkaēn bat hēn pari. Bawal man ha Kautuhan ni apo Moises hēn mangan hēn habayto, ay nangan ya, bayo nam-i ya êt kanlan kalamo na.”

27 Inhundo ni Apo Jesus ya pamaghabi na kanlan Pariseo, ya wana, “Ya allon pamagsimba ay ha ikakangēd hēn tawo. Ya tawo ay alwan ipoh hēn allon pamagsimba.

28 Hiko ya Taga-Langit, ya In-anak Tawo, ay nag tungkulān hēn maghabi no hinoy malyarin daygēn ha allon pamagsimba.”

3

Ya lalaki ya natsi ya mihay gamēt

(*Mateo 12:9-14; Lucas 6:6-11*)

1 Ha mihay na êt ya allon pamagsimba la, hên hinumwêñ hi Apo Jesus ha sinagoga ta manoro, ay main lalaki bayro ya natsi ya panabtab gamêt.

2 Hilay Pariseo haka mánoron Kautuhan ni apo Moises, ay ampangimaton kan Apo Jesus, no ma-maalíh yan hakit ha allon pamagsimba la, ta êmêñ la yan bad-an hên ampanyag yan bawal ha allon pamagsimba.

3 Wani Apo Jesus kanan lalaki ya natsi ya gamêt, “Mirêng ka di ha arapan lan kal-atan.” Dinyag nay kalabayan ni Apo Jesus.

4 Bayo kinotang ni Apo Jesus hilay Pariseo haka mánoron Kautuhan ni apo Moises, ya wana, “Hinoy nakahulat ha Kautuhan ni apo Moises ya tungkol ha dapat daygên ha allon pamagsimba? Manyag hên kangêran o manyag karawakan? Mamilitas o mamatsi?” Noa, ayn miha man ya naghabi.

5 Amêhêñ, inubuh na hilan hinlêk ni Apo Jesus hên main huluk haka ingalo gawan ha kakdêyan ulo la. Bayo wana kanan lalaki ya natsi ya gamêt, “Ipaktang moy gamêt mo.” Hên impaktang na, ay naalíh ya hakit ha gamêt na.

6 Tampol hilan nammita ya hilay Pariseo, haka kalamo lan kagampi ni Herodes Antipas, ay pinipupulungan lay na hi Apo Jesus.

7-8 Hilan Apo Jesus etaman, ay nammitay na hên palako ha laylay hên Dagat-dagatan hên Galilea. Main hadyay kal-atan ya taga-probinsyan Galilea ya nangamat kanlan Apo Jesus hên manggilam toro na, haka magpaalíh hên hakit la. Main êt bayron kal-atan ya ubat ha probinsyan Judea,

balayan Jerusalem, probinsyan Idumea, ha lipay hên Illog Jordan, ha balayan Tiro boy Sidon, haka ha mamalibot bayro.

⁹ Gawan ha kal-atan, ay in-utoh nay tagahonol na, ya mamil-an hên bangka ya mahakyen na ta êmêñ ya a mapi-piitan hên kal-atan.

¹⁰ Gawan mal-at ya inalihan nan hakit, gap-an la ya dayi hi Apo Jesus hên hilay nipaghakit ta êmêñ maalih ya hakit la.

¹¹ Hilay hinapatan hên nangarawak ya a angkahêlêk, ay ampandoko ha arapan na haka ampipan-angaw hilay hinumapat kanla, ya wanla, “Hika ya Anak ni Apo Namalyari!”

¹² Noa, impakabawal na hila hên ipamwang ya hiyay Mesias, ya Cristo.

Ya pamamili ni Apo Jesus hên labinloway apostolya in-utoh na hên manoro

(Mateo 10:1-4; Lucas 6:12-16)

¹³ Bayo nilumakat hilan Apo Jesus ha mihay tawgtug. Hêñ nakalakat hilay na, ay pinarani na hilay tagahonol na.

¹⁴ Namilya hêñ labinlowa kanla ya pinata-ngalanan nan apostol ya panay nan makalamo, haka iutoh nan mamipamwang hêñ Mangêd ya Habi,

¹⁵ haka ya dyanan nan kapangyarihan hêñ mamaalih hêñ nangarawak ya a angkahêlêk ya hinumapat ha tawo.

¹⁶ Habaytsi hilay labinlowa ya pinili na hêñ mag-in apostol na: hi Simon, ya pinata-ngalanan nan Pedro,

17 ya loway anak ni Zebedeo, hi Santiago haka hi Juan. (Pinata-ngalanan na hilan Boanerges, ya labay habiên makhaw ya nakêm la.)

18 Ya kaatag ay hi Andres, hi Felipe, hi Bartolome, hi Mateo, hi Tomas, haka hi Santiago ya anak ni Alfeo, hi Tadeo, hi Simon ya Makabayan,

19 haka hi Judas Iscariote ya nay-upit kan Apo Jesus.

Ya kapangyarihan ni Apo Jesus ay ubat kan Apo Namalyari, alwan ubat kan Satanas

(Mateo 12:22-32; Lucas 11:14-23; 12:10)

20 Hêñ nuli hilan Apo Jesus, ay nipagtisipon hilay na êt ya kal-atan, kabay a lay na maarap hêñ mangan hilan Apo Jesus.

21 Nagilam lan kamag-anak ni Apo Jesus ya pan-habiên lan kaatag, ya angkamurit yay na, kabay nammita hilay na ta iuli la ya dayi.

22 Main bayron móñoron Kautuhan ni apo Moses ya nilumohan ya ubat ha Jerusalem. Hinabi la ya hi Apo Jesus ay hinapatan ni Satanas,* ya poon lan nangarawak ya a angkahêlêk. Haka hinabi la êt ya pamaalíh ni Apo Jesus hêñ nangarawak ya a angkahêlêk ya hinumapat ha tawo, ay ha kapangyarihan ni Satanas.

23 Pinarani na hilay habayto ta hinabi na kan-lan paalimbawa, ya wana, “Yarin maipaplag ni Satanas ya sarili na!

24 No alimbawa ta mipapatsi ya angkalokopan hêñ mihay bansa, ay mahira ya habayto.

25 Êmbayro êt ya malyari ha mipapamilya ya mipapatsi.

* **3:22** Beelzebul ha habin Griego.

26 No mipapatsi hilay angkalokopan ni Satanas, ay mahira ya pamanlokop na.

27 “Hi Satanas ay nanad ha mihay makhaw, ya mal-at ya almas, ya ampamantay ha bali na. A makwa, ya hinon atsi kana, no a ya pon hambutêñ, haka gapohêñ. Noa, no gapohêñ ya, ay makwa ya kaganawan ya atsi kana.

28 “Pakagilamêñ yoy habaytsi. Mapatawad hilay mipaghêhê ha nadyag lay kasalanan, haka ha hinabi lan pamaniran kapareho lan tawo,

29 noa, ayn hinoman ya mapatawad ha hinabi lan pamaniran Espiritu ni Apo Namalyari. Ta habaytoy kasalanan, ay taganán ayn kapatawaran.”

30 Hinabi ni Apo Jesus ya habayto, ta êmén la mamwangan ya ha pangahabi la, ya hiyay hinapatan hêñ narawak ya a angkahêlêk, ay anhiraêñ lay Espiritu ni Apo Namalyari ya ampangubatan hêñ kapangyarihan ni Apo Jesus.

Hilay ampanggilam habi ni Apo Jesus, ay anlugurêñ na hêñ nanad ha pamanlugud na ha indo na, haka hilay patêl na

(Mateo 12:46-50; Lucas 8:19-21)

31 Hêñ nilumatêng ya indo ni Apo Jesus haka hilay patêl na, ay a hila midani kana gawan ha kaltatan. Kabay impabaêg la ya tana.

32 Main naghabi kana, ya wana, “Atsi di ha ilwangan ya indo mo haka hilay patêl mo. Labay la kan makahabi.”

33 Wani Apo Jesus kana, “Hino ya indo ko, haka hino hilay patêl ko?”

³⁴ Hinlêk nay nakaiknon nakapalibot kana, ta wana, “Hilay habaytsi ya indo ko, haka hilay patêl ko.

³⁵ Hilay ampanyag kalabayan ni Apo Namalyari, ay yabay ya anlugurên ko hên nanad ha pamanlugud ko ha indo ko, haka hilay patêl ko.”

4

Ya alimbawa ya tungkol ha bini ya inhabwag (Mateo 13:1-9; Lucas 8:4-8)

¹ Nanoro yay na êt hi Apo Jesus ha laylay Dagat-dagatan hên Galilea. Gawan ha hadyay kal-atan ya ampipagtsipon hên labay manggilam toro na, ay hinumakay ya ha mihay bangka, ta bayro yan nikno hên nanoro kanlan hadyay kal-atan ya atsi ha laylay.

² Ha pamanoro na kanla, ay mal-at ya paalimbawa, ya wana,

³ “Pakagilamên yoy habaytsi! Main mihay lalaki ya namihabwag hên bini.

⁴ Ha pamihabwag nan bini, ay main bini ya natata ha dann. Habaytoy tinuktuk hên manok.

⁵ Ya kaatag ay natata ha mabato. Tampol yan tinumubo, gawan ha mababo ya luta.

⁶ Noa, hên nangallo, ay nayanto ya, gawan a nipakalalê ya yamot.

⁷ Ya kaatag ay natata ha kadiwian. Tinumubo ya bini, noa, a hinumlay gawan diwi.

⁸ Ya kaatag ay natata ha mataba ya luta. Tinumubo ya habaytoy bini haka naubuh hên nanagêy hên main manimagatoh ya lahi, anêmapo, o tatlumpo hên oman.”

9 Hêñ nahabi nay na ya habayto ni Apo Jesus, ay wana êt, “Pakaihipêñ yoy nagilam yo!”

*No pata paalimbawa ya panoro ni Apo Jesus
(Mateo 13:10-17; Lucas 8:9-10)*

10 Hêñ nakabita hilay nay kal-atan, ay main tanan ungno bayro ya kalamo lan labinloway tagahonol ni Apo Jesus, ya nangotang no hinoy labay habiêñ hêñ habaytoy alimbawa.

11 Kabay wani Apo Jesus kanla, “Hikaw bat ya makamwang hêñ inlihim ya tungkol ha paman-lokop ni Apo Namalyari, noa, kanlan kaatag ay anhabiêñ ko ha alimbawan bêngat.

12 Ta êmêñ,
‘Manlêk hila man, ay a la mamwangan ya anhêlkêñ la.
Manggilam hila man, ay a la maintindihan.
Ta kayno maintindihan la, haka maghêhê hilan dumani kan Apo Namalyari, bayo patawarêñ hila.’ ”*

*Impamwang ni Apo Jesus ya labay habiêñ hêñ habaytoy alimbawa ya tungkol habini ya inhabwag
(Mateo 13:18-23; Lucas 8:11-15)*

13 Bayo wanay na êt kanlan tagahonol na, “Awta a yo angkaintindihan ya alimbawa ya tungkol ha bini ya inhabwag! Ay-êmêñ yon maintindihan ya kaatag ya alimbawa!

14 Ya ampamihabwag bini, ay ampamibahwag hêñ habi ni Apo Namalyari.

15 Ya nakêñ tawo ay in-alimbawa ha natataan bini. Ya bini ya natata ha dann ay habi ni Apo Namalyari ya nagilam lan tawo, noa, tampol

* **4:12** Isaias 6:9-10.

nilumatêng hi Satanas, ta inalíh nay habaytoy habi ha nakêm la.

¹⁶ Ya bini ya natata ha kabatoan, ay habi ni Apo Namalyari ya tinanggap lan tawo hên main kahiglaan,

¹⁷ noa, a nimana ha nakêm la. Naniwala hila pon, noa, hên nilumatêng ya kairapan o pamairap, ay tampol naalíh ya paniwala la.

¹⁸ Ya bini ya natata ha kadiwian ay habi ni Apo Namalyari ya ginilam lan tawo pon,

¹⁹ noa, tampol nialíh ha nakêm la, gawan ha kayagahan, pibandian, haka katsighaw hên biyay la. Kabay a nabayo ya biyay la, hên nanad ha a nanagêy ya bini ya inhabwag.

²⁰ Ya bini ya inhabwag ha mataba ya luta ay habi ni Apo Namalyari ya ginilam lan tawo, bayo nimana ha nakêm la, ya nanad ha lahí ya naubuh hên nanagêy hên main manimagatoh ya lahí, anêmapo, o tatlumpon oman.”

*Ya atáng ay dapat idin ha taganán pamyanan
(Lucas 8:16-18)*

²¹ Wanay na êt ni Apo Jesus, “Ayn mamagkêt hên atáng, bayo halokoban. A etaman idin ya atáng ha hilong pangkatuluyan. Noa, ya atáng ay idin ha mantêg hên pamyanan atáng.

²² Ayn inhimpan ya a miawah. Ayn êt inlihim ya a mamwangan haka mihumbung.

²³ Hikaw ya ampanggilam, ay pakaihipên yoy habayto.”

²⁴ Inhundo ni Apo Jesus ya panoro na, ya wana, “Pakaihipên yoy angkagilam yo, ta no honolên yoy toro ko, ay taganán maintindihan yo. Ta

no ay-êmên ya pamaytakal yon pamanggilam, ay êmbayro êt ya takal hên pamangintindi ya idin kamoyu ni Apo Namalyari.

²⁵ No honolên yoy toro ko, ay mapahanan ya pamangintindi yo, noa, no a yon honolên, ay alihêñ êt kamoyu ya pêpêrad ya naintindihan yo.”

Ya pamanlokop ni Apo Namalyari ay in-alimbawa ni Apo Jesus ha pamantumubo hên bini ya in-êhad

²⁶ Wanay na êt ni Apo Jesus kanla, “Ya pamanlokop ni Apo Namalyari ay maialimbawa ha pamantumubo hên bini ya in-êhad hên mihay lalaki.

²⁷ Pinaulayan nan tinumubo, ta inhundo nay pamag-obra na hên allo-allo. Ya pamantumubon habayto, ay a na angkaintindihan no ay-êmên.

²⁸ Nag-in malakarayêm ya habayto gawan ha luta, haka tinumubo angga ha nanagêy hên mangataba ya lahi.

²⁹ Hên nawtoy na, ay tampol nay nan ginapah gawan nilumatêng ya pamanggapah.”

Ya pamanlokop ni Apo Namalyari, ay in-alimbawa ni Apo Jesus ha pamantumubo hên mihay nanaway but-o

(Mateo 13:31-32, 34; Lucas 13:18-19)

³⁰ Amêhêñ, inhundo ni Apo Jesus ya panoro na, ya wana, “Nanad hino kaya ya pamanlokop ni Apo Namalyari? Hino kaya ya pangialimbawaan ko hên pamanlokop na?

³¹ Ya pamanlokop ni Apo Namalyari ay maialimbawa ha pamantumubo hên mihay nanaway but-o ya intanêm. Iibon man ya but-o,

³² ay hinumlay yan nag-in kayo, kabay nipanyag halay ya manok-lalê ha hanga na.”

*Paalimbawa ya pamanoro ni Apo Jesus
(Mateo 13:34)*

³³ Mal-at pon ya êmbayroy alimbawa ya intoro ni Apo Jesus kanlan kal-atan ya agyu lan maintindihan.

³⁴ Hêñ nanoro hi Apo Jesus kanlan kal-atan, ay taganán mal-at ya alimbawa ha panoro na. Noa, hêñ hila-hila tanay labinloway tagahonol na, ay inubuh nan impamulah kanla ya habayto.

*Pinatunggén ni Apo Jesus ya hadyay angin
(Mateo 8:23-27; Lucas 8:22-25)*

³⁵ Habaytoy allo, hêñ yabi yana, ay hinabi ni Apo Jesus ha tagahonol na, “Magbangka kitamo hêñ lumipay ha dagat-dagatan.”

³⁶ Imbalag lay kal-atan ta hinumakay hila ha bangka ya andyanan ni Apo Jesus, ta nag-umpisa hilay nan lumipay. Main êt hêñ kaatag ya bangka, ya nilumipay.

³⁷ Amêhêñ, nagkamain hêñ hadyay angin, haka ya bangka la ay angkapnoy nan lanêm.

³⁸ Hi Apo Jesus ay nabêlêw hêñ nakaulon ha dapit bulian hêñ bangka. Pinukaw la ya, ya wanla, “Mánoro! A mo muwang ya ampilêmêh kitamina?”

³⁹ Nimata ya, ta pinatunggén nay angin haka hadyay tandulon. Tinunggén etaman ya angin haka hadyay tandulon.

⁴⁰ Bayo wana kanlan tagahonol na, “Pata hadyay limo yo! Ayn kaw pon awud hêñ paniwala kangko!”

41 Na-êngap hila ha hadyay limo la, haka ha pag-êpapah la, ay nihahabi hilan êmén di, “Hino kayay hatsi ya ampamipatunggên hên angin haka tandulon bayo anhumonol hila kana?”

5

Namaalih hi Apo Jesus hên nangarawak ya a angkahêlêk, ya hinumapat kanan mihay lalaki ya Geraseno

(*Mateo 8:28-34; Lucas 8:26-39*)

1 Nilumatêng hilan Apo Jesus ha logal lan Geraseno* ha lipay dagat-dagatan ha êtêb hên probinsyan Galilea.

2 Pagtaoy ni Apo Jesus ha bangka, ay tinupa ya hên mihay lalaki ya hinapatan hên nangarawak ya a angkahêlêk ya ubat ha pay-ilbêngan.

3 Ampaidi ya tana ha pay-ilbêngan. A la yay na maigapoh, hên taykala man.

4 Kata-ungno lay nan an-igapoh, noa, panay nan pamboytoên ya taykala ha bitsih haka ha gamêt na. Ayn taganán ampakapatgên kana.

5 Allo-yabin nagkotawan ya ha pay-ilbêngan haka ha kabung-oyan hên ampiangaw-angaw hên anhugatêñ nay lawini na hên bato.

6 Hêñ nahêlêk na ya hi Apo Jesus ha marayo-dayo, nuwayu yan napaidani hên nandoko hên nakadêngdêng ha arapan na.

7 Nan-angaw ya, ya wana, “Jesus, ya Anak ni Apo Namalyari ya ayn kapantag ha kapangyarihan, awta ampakiêménan mo ko? Maghumpa ka ha arapan ni Apo Namalyari, ya a mo kon parusaan!”

* **5:1** Gergeseno o Gadareno ha kaatag ya Kahulatan Griego.

⁸ Hinabi nay habayto gawan ampaalihêni Apo Jesus ya nangarawak ya a angkahêlêk ya nipanhumapat kana.

⁹ Amêhêni, kinotang ya ni Apo Jesus, “Hinoy langan mo?” Wanlan hinumapat kana etaman, “Libo-Libo.” Hinabi lay habayto gawan mal-at hilay nangarawak ya a angkahêlêk ya nipanhuma-
pat kana.

¹⁰ Habaytoy nipanhumapat ay nakiingalo kan Apo Jesus, ya paan hila dayin ipaplag ha legal ya habayto.

¹¹ Main kal-atan baboy ya ampipambuk bayro ha talindah hêni bung-oy ya nahêned ha dagat-dagatan.

¹² Nakiingalo hilay hinumapat hêni paulayan hila dayi hêni mipanhumapat kanlan baboy.

¹³ Pinaulayan na hila etaman ni Apo Jesus. Kabay inumalih hila kanan lalaki ta nipanhuma-
pat hila kanlan baboy. Hilay manga lowan liboy baboy ya hinapatan la, ay nipamwayun palohan ha natalindah ya laylay lanêm hêni nilêmêh ha dagat-dagatan.

¹⁴ Hilay manayhay hêni baboy, ay nipamwayu, ta habaytoy nalyari, ay impamwang la ha kabaryo haka kabalyan la. Hêni nagilam lan kaatag ya balita la, ay nilako lan hinlêk ya nalyari.

¹⁵ Hêni nilumatêng hila kanlan Apo Jesus ay nahêlêk lay lalaki ya inalihan nangarawak ya a angkahêlêk. Nakatakop yay na haka ampikno hêni napatêkbêk ya ihip. Naubuh hilan nalimwan ha kapangyarihan ni Apo Jesus.

¹⁶ Impamwang lan nakahêlêk no ay-êmêni yan

namaalíh hêñ nangarawak ya a angkahêlêk ya hinumapat kanan lalaki, haka ya nalyari kanlan baboy.

¹⁷ Hêñ nagilam lay habayto, ay nakiingalo hila kan Apo Jesus ya mag-alíh ya ha logal la.

¹⁸ Hêñ anhumakay yay na hi Apo Jesus ha bangka, ay nakiingalo ya inalihan nangarawak ya a angkahêlêk hêñ gêtan ya dayi.

¹⁹ A na ya pinaulayan, ta impaorong na ya ni Apo Jesus, ya wana, “Muli kay na ha bali mo ta ipamwang mo ya kangêran ya dinyag kamo hêñ Panginoon, haka no ay-êmén na kan iningalwan.”

²⁰ Nammitta yay nay lalaki, ha mapoy balayan ha logal na, ya ambaêgên lan Decapolis, ta impamwang nay tungkol ha dinyag kana ni Apo Jesus, kabay naubuh hêñ nipag-êpapah hilay nak-agilam.

*Biniyay ya anak ya babayi ni Jairo haka pinaalíh
ya hakit hêñ babayi ya labinloway taon nanan am-
paghakit*

(Mateo 9:18-26; Lucas 8:40-56)

²¹ Amêhêñ, ha pag-orong lan Apo Jesus hêñ nag-bangkan ubat ha lipay, ay kal-atan ya nanupa kanla ha laylay lanêm.

²² Main dinumani hêñ nandoko hêñ nakadêngdêng ha bitsih ni Apo Jesus ya mihay ampamaala ha sinagoga, ya nag langan Jairo.

²³ Impapakahabi na kan Apo Jesus, ya kihonol ya kana ha bali na, ta ipalunto nay gamêt na ha anak nay babayi, hêñ paalihêñ dayi ya hakit na, ta êmén ya mabiyay ya ampamêrad tanan matsi.

24 Kabay nakihonol hilan Apo Jesus kan Jairo. Kal-atan ya nakihonol kanla haka ampi-pipiitan la hi Apo Jesus.

25 Kalamo lan hata kal-atan, ya mihay babayi ya labinloway taon nanan ampag-irap ha hakit nan andayaêñ.

26 Naiubuh nay na ya pibandian na ha hinohino kay na hêñ ya doktor, haka nairapan ya êt ha pamanambal la hêñ hakit na, bayo nilumdêg êt ya habayto.

27 Hêñ namwangan na, ya tungkol kan Apo Jesus, ay dinumani ya kana hêñ ginapa ya takop ni Apo Jesus.

28 Dinyag nay habayto ta hinabi na ha sarili na, no magapa nan bat ya takop ni Apo Jesus, ay maalíh ya hakit na.

29 Tambêng etaman tinunggêñ ya ampantoloy daya na, kabay natanam nay naalíh ya hakit na.

30 Tampol nan natanam ni Apo Jesus ya main inalihan hêñ hakit, gawan ha kapangyarihan na. Namalingay ya, ta wana, “Hinoy nakagapa hêñ takop ko?” Hêñ ayn mangamin, ay hinabi lan tagahonol na,

31 “Panginoon, ampilolopungan la ka, haka la kan ampi-pipiitan hêñ kal-atan! Pata ampan-gotang ka no hinoy nakagapa kamo!”

32 Noa, ampakatapolên ni Apo Jesus no hinoy nakagapa kana.

33 Nalimwan ya babayi gawan muwang na ya nalyari kana. Kabay ampamêgpêg yan nandoko hêñ nakadêngdêng ha arapan ni Apo Jesus, ta inamin na ya hiyay nakagapa kana haka naalíh ya

hakit na.

³⁴ Wani Apo Jesus kanan babayi, “Inalíh ya hakit mo gawan ha paniwala mo kangko. Muli kay na, hén mapatékbék ya ihip ta inalíh ya hakit mo.”

³⁵ Kaban ampaghabi ya pon hi Apo Jesus, ay main nilumatêng ya ubat ha bali ni Jairo, ya naghabi, “Natsi ya anak mo. A minan abalaên hi Apo Jesus hén maniraw ha bali.”

³⁶ Noa, hén nagilam ni Apo Jesus ya habayto, ay wana kan Jairo, “Paan kan maglungkot. Ihundo moy paniwala mo ya maalíh koy hakit na.”

³⁷ Kabay inhundo lay pammita la. Ya pinaulayan nan bêngat ni Apo Jesus hén makilako kanla, ay hi Pedro, hi Santiago haka hi Juan ya kapotoh pohêl ni Santiago.

³⁸ Panlumatêng la ha bali lan Jairo, ay nahêlêk ni Apo Jesus ya ampipanangih haka ampipanyêngên ya atsi bayro.

³⁹ Kabay hinabi na kanla, “Paan kaw manangih, ta a ya natsi. Nabêlêw yan bêngat.”

⁴⁰ Kinailyan la ya hi Apo Jesus, ta muwang la ya pêtêg yay nan natsi. Hén naipaawah na hilay kal-atan ya atsi bayro, ay hinumwêng yay na ha pinaypakatuluyan kanan anak, hén kalamoy toa na, haka ya tagahonol na hi Pedro, hi Juan, haka hi Santiago.

⁴¹ Tinalan ni Apo Jesus ya gamêt nan anak, ta hinabi na, “Talita kumi,” ya labay habiên, “Anak ko, mimata ka.”

⁴² Tambêng yan nimata ya anak, haka namibita. (Labinloway taon na.) Hadyay pag-êpapah lan atsi bayro.

⁴³ Binawal na hila hêñ ipamwang ha kaatag ya biniyay nay anak. Hinabi na êt ya pakanêñ la ya.

6

*A ya pinaniwal-an hi Apo Jesus ha balayan Nazaret, ya pinanhumlayan na
(Mateo 13:53-58; Lucas 4:16-30)*

¹ Amêhêñ, nuli ya hi Apo Jesus ha balayan Nazaret, ya pinanhumlayan na. Kalamo na hilay tagahonol na.

² Hêñ allon pamagsimba, ay hinumwêñ ya ha sinagoga la, ta nanoro ya. Haka ha pamanoro na, ay nipag-êpapah hilay nakagilam, ya wanla, “Ay-iri nan nakwa ya kamwangan na boy ya kapangyarihan na hêñ manyag hêñ kapapaêpapah?

³ Daptay hiyay kalpintero ya kabalayan tamo ya anak ni Maria! Yarin alwan hiyay patêl lan Santiago, Jose, Judas, haka hi Simon! Yarin alwan kabalayan tamo ya patêl nay babayi!” Kabay a la ya tinanggap.

⁴ Bayo wani Apo Jesus kanla, “Hilay propeta ni Apo Namalyari, ay anggalangêñ ha agyan ayri ya logal, noa, a hila ampansinêñ hêñ kamag-anak la haka kabalayan la.”

⁵ Gawan ayn hilan paniwala kana, ay pêrad bat ya inalihan nan hakit. Ayn kaatag ya kapapaêpapah ya dinyag na bayro ha Nazaret.

⁶ Nag-êpapah hi Apo Jesus, ta taganán ayn hilan paniwala kana.

*Inutuhan na hilan manoro ni Apo Jesus ya labin-loway tagahonol na ya binaêg lan apostol
(Mateo 10:5-15; Lucas 9:1-6)*

Bayo nanoro ya hi Apo Jesus ha mal-at ya baryo ha namalibot hēn Nazaret.

⁷ Haka tsinipon na ya labinloway tagahonol na, ta dinyanan na hilan kapangyarihan, hēn mamaalih hēn nangarawak ya a angkahēlēk ya hinumapat ha tawo, bayo in-utoh na hila hēn manilowa hēn manoro.

⁸ Bayo hila nammita, ay hinabi na kanla, “Paan kaw mantan hēn hinoman ya nanad ha puto, balutan, haka pera. Magtēkēn kaw tana.

⁹ Mag-apin kaw bitsih, noa, paan kaw mantan hēn maihagili yoy takop.

¹⁰ Magdahēl kaw ha balin managyat kamoyu, haka bayro kaw tana, hēn angga ha a pon nayari ya pamanoro yo, ha logal ya habayto.

¹¹ No a la kaw tanggapēn, ta a hila mabay manggilam habi yo, ha mihay logal, ay bayo kaw magalih bayro, ay ikampag yoy tuwapok ya atsi ha bitsih yo, ta êmēn la mamwangan ya atsi tana kanla no lumatēng kanla ya parusa ni Apo Namalyari.”

¹² Kabay nammita hilay nay labinlowa hēn nampamwang ha kal-atan ya dapat lan paghēhēan hēn talibatokan ya kasalanan la.

¹³ Namaalih hila hēn kal-atan nangarawak ya a angkahēlēk ya hinumapat ha tawo. Pinunihan lan pērad ya laro ya kal-atan nipaghakit haka namaalih hilan hakit la.

Ya kamatsan ni Juan Bautista

(Mateo 14:1-12; Lucas 9:7-9)

¹⁴ Nagilam ni Herodes Antipas ya ampamaala ha probinsyan Galilea ya tungkol ha kapapaêpapah ya andaygēn lan Apo Jesus, gawan habaytoy nibahwag. Main ampaghabin

ampakadyag yan kapapaêpapah hi Apo Jesus gawan hiya hi Juan Bautista ya nangoman nabiyay.

¹⁵ Main kaatag ya ampaghabin kayno hi Apo Jesus ay Propeta Elias, ya nag-orong ha luta. Hilay kaatag êt ay ampaghabi ya hi Apo Jesus ay nanad kanlan kaatag ya propeta, ya mámpamwang hên an-ipaihip kanla ni Apo Namalyari hên haton lagi.

¹⁶ Noa, hên nagilam ni Herodes Antipas, ya anhabién la, ay wana, “Ya ambaêgén lan Jesus, ay taganán hi Juan Bautista ya impapotoh kinay ulo, ya nabiyay oman, kabay ampakadyag yan kapapaêpapah!”

¹⁷ Hinabi nay habayto gawan hên hato ay hiyay naypadakép, naypagapoh, haka naypahukul kan Juan, gawan kan Herodias, ya ahawa ni Felipe, ya ali ni Herodes Antipas, ya bat nan pinag-ahawa ni Herodes Antipas.

¹⁸ Panay nan an-ungkatén kan Herodes Antipas, ni Juan Bautista, ya wana, “Bawal ha Kautuhan ya pamag-ahawa mo kan Herodias ya ahawan ali mo!”

¹⁹ Gawan habayto, ay main yan hakit nakêm hi Herodias kan Juan, haka ipapatsi na ya dayi, noa, ayn yan madyag,

²⁰ gawan a na ya ampaulayan ni Herodes Antipas, ta anggalangén na hi Juan, gawan muwang na, ya mahonol hi Juan kan Apo Namalyari, haka ayn hilan mahabi ha biyay na. Labay-labay nan manggilam toro na, angkalipang man ya ihip na.

²¹ Mihay allo nakaihip hi Herodias no ay-êmén na yan maipapatsi hi Juan Bautista. Hi Herodes Antipas, ay nagkaluto ha allon pamanêmtêm ha

pay-anak kana. Hinagyat na hilay manungkulanan, haka hilay ampamaala ha hundaloh, haka hilay mabandi ha probinsyan Galilea hên mag-pakahigla hên kalamo na.

²² Timmalêk ya anak ni Herodias ha arapan hên kal-atan. Hinumigla hi Herodes Antipas haka hilay hinagyat na, ha pamagtalêk nan dalaga, kabay wani Herodes Antipas kanan dalaga, ya idin na kana ya hinon pakikwaan na kana.

²³ Nangako ya êt hên main kalamoy humpa, ya idin na kana ya kapitnan bandi na, no habaytoy labay na.

²⁴ Inumawah ya dalaga ta kinotang nay indo na no hinoy pakikwaan na. Wana etaman ni Herodias, “Ya ulo ni Juan Bautista.”

²⁵ Tampol yan nag-orong ya dalaga, hên dinumaní kan Herodes Antipas, ta pinakikwaan na, ya tampol ipapotoh ya ulo ni Juan Bautista, ta idin kanan dalaga ya habayto, hên nakapalunto ha pinggan.

²⁶ Hadyay lungkot ni Herodes Antipas hên pakikwaan kana hên dalaga ya habayto, noa, a na ya matanggian gawan naghumpa ya, haka gawan ha kal-atan.

²⁷ Hên habayto êt, ay in-utoh nay mihay hundaloh ha hukulan hên potohêñ nay ulo ni Juan Bautista. Tampol ya etaman nammita ha hukulan ya habaytoy hundaloh, ta pinotoh nay ulo ni Juan,

²⁸ hên indin ha pinggan, haka gintan kanan dalaga. Indin na etaman hên dalaga, ya habayto kan Herodias, ya indo na.

²⁹ Hên namwangan lan tagahonol ni Juan ya nalyari kana, ay kingwa la ya bangkay na, haka

lay na in-ilbêng.

*Liman libo ya pinakan ni Apo Jesus
(Mateo 14:13-21; Lucas 9:10-17; Juan 6:1-14)*

30 Amêhén, hên nag-orong hilay nay labinloway tagahonol ni Apo Jesus ya in-utoh nan namitoro, ya ambaègén la etaman hên apostol, ay ni-tsitsipon hila, ta in-ubuh lan in-istorya kana ya dinyag la haka intoro la.

31 Noa, a la angkadambi ya pangan la, gawan kal-atan ya angkapiubah hên anlumatêng kanla. Kabay wani Apo Jesus kanla, “Magpainawa kitamo pon bayro ha legal ya kabalah-balahan.”

32 Kabay hila-hila tanay himmakay ha bangka hên naglipay ha legal ya kabalah-balahan.

33 Noa, napansin lan kal-atan ya pamag-alih la, haka ya pagpalakwan la, kabay binitisih lan inunaan hilan Apo Jesus, hên kalamo hilay ubat ha kaganawan balayan ya dinanan la.

34 Hêñ pataoy hilan Apo Jesus ha bangka, ay nahêlêk lay kal-atan, haka naingalwan na hila, gawan nanad hilan tupa ya ayn pastol, kabay malat ya intoro na kanla.

35 Hêñ maranin matata ya allo, ay hinabi lan tagahonol na kana, ya wanla, “Ayn bali di, haka maranin matata ya allo.

36 Dayi ipalako mo hilay kal-atan ha balang baryo, ya narani di, ta êmén hila makahaliw hêñ maëkan la.”

37 Noa, hinabi na kanla, ya wana, “Hikaw tanay mamakan kanla.” Kabay wanla kana, “Labay mon

habiên, hikay ya manaliw hêñ pamangan lan kalatan, ya magkaalaga hêñ upa hêñ mihay katawo ha waloy buwan!"

³⁸ Nangotang hi Apo Jesus, "Ungnoy puto yo? Hêlkêñ yo." Hêñ namwangan lay na, ay hinabi la, "Li-limay puto haka lo-loway kênan lanêm."

³⁹ Bayo in-utoh ni Apo Jesus ha tagahonol na ya paiknoêñ lay kal-atan hêñ pusto-pusto.

⁴⁰ Kabay nipammikno hilay na hêñ pusto-pusto ya main mani-magatoh haka main manilamopo.

⁴¹ Dinampot ni Apo Jesus ya limay puto haka loway kênan lanêm. Naningla ya, ta pinahalamatan nay habayto kan Apo Namalyari. Pino-potoh nay na, ta indin na kanlan tagahonol na, ta intayak la kanlan kal-atan.

⁴² Balang miha ya atsi bayro ay nakaêkan angga ha nangabhoj hila.

⁴³ Hêñ tsinipon la ya tagan, ay nakapno hila êt hêñ labinloway lubon.

⁴⁴ Main liman libo ya lalaki ya nangan.*

Nammita hi Apo Jesus ha babon lanêm

(Mateo 14:22-33; Juan 6:16-21)

⁴⁵ Tampol nan pinahakay ni Apo Jesus ha bangka hilay tagahonol na, hêñ impauna hêñ lumipay ha Betsaida, kaban ampauliên na pon ya kal-atan.

⁴⁶ Hêñ nagtsipan ya kanla hi Apo Jesus, ay nilumakat yay nan nanalangin.

* **6:44** Main êt kal-atan ya babayi haka anak ya nangan. Mateo 14:21.

47 Hêñ yabi yana, kaban ampanalangin yan miha na, ay atsi hilay na ha bonak dagat-dagatan ya tagahonol na.

48 Nahêlêk na hilay angkairapan hêñ lumipay, gawan panhalungatêñ hilan angin. Hêñ nawatah, ay nilako na hila hêñ nammita ha babon lanêm, hêñ makipantag ya dayi kanla,

49 noa, hêñ nahêlêk la yay ampita ha babon lanêm, ay nipan-angaw hila, ta êndat la no hiyay mihay kamana.

50 Naubuh hilan nakahêlêk kana, haka hadayay limo la. Noa, tapol nan hinabi kanla, ya wana, “Paan kaw malimo! Pakhawêñ yoy nakêm yo! Hikoy habaytsi!”

51 Hêñ nakahakay yay na ha bangka, ay tinunggêñ ya angin. Hadyay êpapah la kana,

52 gawan nahêlêk la man, ya pinalakê nay puto, ay a la pon angkaintindihan ya madyag nay hinoman, ha kapangyarihan ni Apo Namalyari, ta taganán a la makwan ihipêñ ya nalyari.

Namaalîñ hi Apo Jesus hêñ kaganawan hakit lan taga-balayan Genesaret

(Mateo 14:34-36)

53 Pamakalipay lan Apo Jesus, ay impadann lay bangka ha dani hêñ Genesaret.

54 Hêñ nakataoy hilan Apo Jesus, ay tapol la yan nabalyan.

55 Pinarah lan impamwang ha boon legal ya habayto, ya nilumatêng hilan Apo Jesus. Kabay hinapwat la hila ha angkatuluyan la ya nipaghakit hêñ gintan kana ay-iri man ya nilako na.

56 Anto man ya lakwêñ nay balayan, baryo, o hinon legal ya main bali, ay anggêtan la ha andanan na, ya nipaghakit. Ampakiingalo hila kan Apo Jesus, ya agyan laylayan dayin takop na, ya magapa lan ampaghakit. Haka hilay nakagapa takop na, ay naalihan etaman hakit.

7

*Ya natotoan la ha ha ninuno, ay paan itad ha Kautuhan ni Apo Namalyari
(Mateo 15:1-9)*

1 Pang-ubat hên habayto, ay main ungnoy Pariseo haka mánoron Kautuhan ni apo Moises ya ubat ha balayan Jerusalem ya nipandumani kan Apo Jesus.

2 Nadambi la ya main tagahonol ni Apo Jesus ya bat hên nangan hên a hinumonol ha natotoan la ha ninuno, no ay-êmén ya pamag-uyah bayo mangan. Kabay êndat lan Pariseo, ya marêmék hilay tagahonol na, ha hêlêk ni Apo Namalyari,

3 ta hilay Pariseo haka hilay kaatag pon ya Israelita, ay a mangan no a hila pon nag-uyah hên nanad ha natotoan la ha ninuno.

4 Haka a lan bat angkaén ya ubat ha palengke, no a la pon uyahan.* Mal-at pon ya natotoan la ha ninuno ya anhonolên la ya tungkol ha pamanguyah hên pamminêman, pamyanan lanêm haka kaldero ya dyag ha tangso.

* **7:4** Ha kaatag Kahulatan Griego, ay nakahulat ya “A hila bat ampangan no ubat hila ha palengke, no a hila pon nag-uyah o nagpalyu.” Ta kayno narêmékan hila ha hêlêk ni Apo Namalyari hên nakapakidani hila ha bawal ha natotoan la ha ninuno.

⁵ Kabay nangotang hila kan Apo Jesus ya hilay Pariseo, haka mánoron Kautuhan ni apo Moises, ya wanla, “Pata a hila anhumonol ya tagahonol mo ha natotoan tamo ha ninuno tamo, no ay-êmén ya pamag-uyah bayo mangan?”

⁶ Wani Apo Jesus, “Pêtêg ya impapêt ni Propeta Isaías ya tungkol kamoyun mapagbabara, ya wana ha Kahulatan ya impahulat ni Apo Namalyari,

‘Ya pamagpuri la kangko, ay atsin bat ha bêbêy la,
ta ayn ha nakêm la.

⁷ Ayn kapukat-pukat ya pamagsimba la kangko, ta
ya natotoan la ha ninuno, ay an-itoro la hèn
nanad ha paytoro la hèn Kautuhan ko.’[†]

⁸ Angkapaulayan yoy Kautuhan ni Apo Namalyari, ta anhonolên yoy natotoan yo ha ninuno yo.”

⁹ Bayo wana êt ni Apo Jesus, “Magaling kaw hèn itad hèn ayn alagá ya utoh ni Apo Namalyari, mahonol yon bat ya natotoan yo ha ninuno!

¹⁰ Ta ya impahulat ni Apo Namalyari kan apo Moises, ay êmén di, ‘Galangên moy tatang haka indo mo,’ haka ‘Hinoman ya maniran toa na, ay dapat patsên.’

¹¹ Noa, an-itoro yo ya malyarin ialay kan Apo Namalyari, ya dapat ihawop ha toa.

¹² Ha pamanoro yon habayto, ay an-ibawal yoy pamanawop ha toa,

¹³ ta antuwarêñ yoy ninuno yo, hèn an-itad yon ayn alagá ya Habi ni Apo Namalyari. Haka kaltatan pon ya êmbahêñ ya andaygêñ yo.”

[†] 7:7 Isaías 29:13.

*Ya ampakarêmêk ha hêlêk ni Apo Namalyari ay angkaubat ha nakêm
(Mateo 15:10-20)*

¹⁴ Bayo pinarani ni Apo Jesus ya kal-atan, ta wana kanla, “Manggilam kaw haka pakaintindiên yoy habaytsi.

¹⁵ Alwan ya an-ihubo ha bêbêy ya ampakarêmêk hêñ tawo ha hêlêk ni Apo Namalyari, noa, ya ampakarêmêk, ay ya nangarawak ya habi ya angkaubat ha bêbêy.

¹⁶ (Pakaihipêñ yoy nagilam yo!)”

¹⁷ Pamakayari nan naghabi, ay imbalag ni Apo Jesus ya kal-atan, ta hinumwêñ ya ha lalêñ bali. Bayo nangotang hilay tagahonol na no hinoy labay habiêñ hêñ habaytoy alimbawa.

¹⁸ Wana etaman kanla, “Hikaw man, ay a kaw ampakaintindi? Alwan pamangan ya an-ihubo ha bêbêy ya ampakarêmêk hêñ tawo ha hêlêk ni Apo Namalyari.

¹⁹ Ta ya pamangan, ay a ampidann ha nakêm, noa, ha bitoka bayo itaká.” Ha pangahabi ni Apo Jesus hêñ habayto, ay labay nan habiêñ ya ayn bawal ya pamangan.

²⁰ Inhundo ni Apo Jesus ya pamaghabí na, ya wana, “Ta ya nangarawak ya habi ya angkaubat ha bêbêy, ay yabay ya ampakarêmêk hêñ tawo ha hêlêk ni Apo Namalyari.

²¹ Ta angkaubat ha nakêm ya kaihipan hêñ manyag karawakan, nanad ha manyag karawakan kalabayan lawini, manakaw, mamatsin kaparehon tawo,

22 makilalaki haka mamabayi, manyag kapanalarêhan, haka kaganawan karawakan nanad ha pamanloko, manyag kagatêan hên ayn pamag-pigil ha sarili, bat maridya, maniran kapareho, mag-in mayabang, haka manyag ayn kapukatan.

23 Kaganawan hên habayto ay angkaubat ha nakêm haka ampakarêmêk ha hêlêk ni Apo Namalyari.”

Ya paniwala hên mihay babayi ya alwan Israelita
(Mateo 15:21-28)

24 Immalíh hilan Apo Jesus bayro hên palako ha Tiro ya legal hên alwan Israelita, haka hinumwêhila ha mihay bali bayro. A na labay hên mamwangan hên kaatag ya atsi hila bayro, ta magpainawa hila dayi, noa, napansinan hila.

25 Main bayron babayi ya nag anak ya hinapatan narawak ya a angkahêlêk, ya tampol hên nakamwang hên atsi ya bayro, kabay nilumatêng yan nandoko hên nakadêngdêng ha arapan na.

26 Habaytoy babayi ay alwan Israelita ta hiyay Griego ya taga-Sirofenicia. Nakiingalo ya kan Apo Jesus ya ipaplag ya hinumapat ha anak nay babayi.

27 Wani Apo Jesus kana, “Pakangêrên ko pon hên toroan haka hawpan ya hilay Israelita. Ta habaytoy taganán usto.”

28 Noa, hinabi nan babayi, ya wana, “Panginoon, mangêd ya habayto, noa, yarin a minan hawpan ya alwan Israelita no hadyay pamairap ya angkatanam la!”

29 Bayo wana kana, “Gawan ha paniwala mo kangko, ay muli kay na, ta naipaplag ya hinumapat ha anak mo.”‡

30 Hêñ nuli ya habaytoy babayi, ay nalatngan nay anak nay ampamatuloy hêñ napatêkbêk ha papag gawan naipaplag ya hinumapat kana.

*Ya têkkên haka a makayn makahabi, ay pinahabi
haka pinagilam ni Apo Jesus*

31 Ha pag-orong lan Apo Jesus hêñ ubat ha legal Tiro ay nagdann ya ha legal hêñ Sidon ha palakon Dagat-dagatan hêñ Galilea ha mapoy balayan ha legal, ya ambaêgêñ lan Decapolis.

32 Main ungro bayro ya nantan kan Apo Jesus hêñ mihay lalaki ya têkkên haka a makayn maka-habi. Nakiingalo hila kana ya ipalunto nay gamêt kanan têkkên ta paalihêñ nay hakit na.

33 Indayo ni Apo Jesus ya lalaki kanlan kal-atan, ta ingkulug nay panoro na ha têkk nan lalaki, pangayari, ay nandula ya ha gamêt na ta impunih na ha dila nan lalaki.

34 Naningla hi Apo Jesus ha langit hêñ nakauyamêh ha panalangin na, bayo wana kanan lalaki, “Effata!” ya labay habiêñ, “Magloat!”

35 Tampol ya etaman nakagilam haka naka-paghabi yay nan mangêd.

36 Kata-ungno na hilan binawal ni Apo Jesus ya paan lan ipamwang ya habayto. Noa, lalo lan impamwang.

‡ **7:29** Ha pamipaplag ni Apo Jesus ha hinumapat ha anak hêñ alwan Israelita, ay mamwangan ya anhêlkêñ ni Apo Namalyari ya laman hêñ nakêm hêñ balang miha, ayn kana no hinoy ninuno la.

³⁷ Hadyay êpapah la, ya wanla, “Mangêd ya kaganawan andaygên na. Ampagilamên nay têkkêh haka ampahabién nay pipi!”

8

*Apat ya libo ya pinakan ni Apo Jesus
(Mateo 15:32-39)*

¹ Hêñ habayto, ay naka-tsipon hilay na êt ya kalatan ya nanggilam hêñ toro ni Apo Jesus. Hêñ ayn hilay nan maêkan, ay binaêg ni Apo Jesus ya tagahonol na, ta wana kanla,

² “Kaingalo hilay kal-atan, ta tatloy nay allo la di, haka ayn hilay nan maêkan.

³ No pauliêñ ko hilan angkablay lonoh, ay kayno mawê hila ha dann, ta marayo ya ubatan lan kaatag.”

⁴ Wanlan tagahonol na etaman, “Ay-êmêñ tamo hilan mapakan ya hata kal-atan di ha kabalah-balahan?”

⁵ Kinotang hila ni Apo Jesus, ya wana, “Main kitamo pon hêñ puto?” Wanla kana, “Main tanan pito.”

⁶ Bayo pinaikno na hilay kal-atan, haka na dinampot ya pitoy puto, ta impahalamat na kan Apo Namalyari, bayo pino-potoh nay habayto, ta impatayak na kanlan tagahonol na.

⁷ Main hila etaman hêñ ungnoy nanganaway kênan lanêñ ya pinirito. Impahalamat na êt kan Apo Namalyari ya habayto, bayo impatayak na etaman kanlan tagahonol na.

⁸ Naubuh hilan nangabhoy ya kal-atan, haka hêñ tsinipon lay tagan, ay nakapno hila hêñ pitoy lubon.

9 Main manga apat ya libo ya nangabhoy. Bayo nagtsipan yay na kanla.

10 Hilan Apo Jesus etaman, ay hinumakay ha bangka hēn palako ha legal hēn Dalmanuta.

Ampanapol hilay Pariseo hēn kapapaēpapah ya ubat ha langit

(*Mateo 16:1-4*)

11 Main ungnoy Pariseo ya nilumatēng, ta pinakihubakan la ya hi Apo Jesus. Sinubuk la yan mamipahlēk yan kapapaēpapah ya ubat ha langit, ta êmēn la mamwangan no pêtēg hēn atsi kana ya kapangyarihan ni Apo Namalyari.

12 Nakauyamêh ya hi Apo Jesus, bayo wana, “Hay! Awta ampanapol kaw hēn kapapaēpapah! Pakagilamên yo! Taganán ayn ipahlēk kamoyu ya palatandaan ya hikoy in-utoh ni Apo Namalyari!”

13 Bayo nilakwanan na hilay na, ta himmakay hilay na ha bangka hēn palipay hilan Apo Jesus.

In-alimbawa ni Apo Jesus ha pampaalsa, ya panapol lan Pariseo hēn kapapaēpapah ya ubat ha langit

(*Mateo 16:5-12*)

14 Naliwaan lan tagahonol ni Apo Jesus hēn mantan puto, kabay mimiha tanay puto ya atsi ha bangka.

15 Bayo binilinan hila ni Apo Jesus ya wana, “Kaillag kaw ha pampaalsa lan Pariseo haka ha pampaalsa ni Herodes Antipas.”

16 Gawan ha hinabi ni Apo Jesus, ay êndat lan tagahonol na no mantēg pampaalsa hēn arina ya hinabi na kanla, kabay nihahabi hila, ya wanla,

“Hinabi nay habayto gawan a kitamo nakagêtan puto.”

¹⁷ Muwang ni Apo Jesus ya ampihababian la, kabay wana kanla, “Pata an-ikayagah yoy a kaw nakagêtan puto! A kaw pon awud hêñ am-pakaintindi! A yo pon angkakwan ihipêñ no ay-irin ubat ya kapangyarihan ko!

¹⁸ Nanad kaw ayn mata, haka ayn têkk! Nali-waan yoy na lawêh hêñ pinakan koy liman libo ha li-limay puto!

¹⁹ Ungnoy lubon ya napno hêñ tagan ya tsinipon yo?” Wanla kana, “Labinloway lubon.”

²⁰ Wanay na êt ni Apo Jesus, “Haka ungnoy lubon ya napno hêñ tagan ya tsinipon yo hêñ pinakan koy apat ya libo ha pi-pitoy puto?” Wanla etaman, “Pitoy lubon.”

²¹ Bayo wana kanla, “A kaw pon ampakaintindi?”

Naypamukat hi Apo Jesus hêñ mihay buwag ha balayan Betsaida

²² Hêñ nilumatêng hilan Apo Jesus ha balayan Betsaida, ay main ungno bayro ya nantan hêñ mihay lalaki ya buwag, ya pinakiingalo la kan Apo Jesus.

²³ Inakay ni Apo Jesus ya buwag hêñ indayo ha balayan. Bayo nandula ya ha gamêt na, ta impunih na ha mata nan buwag, bayo impalunto nay gamêt na kana, haka kinotang na ya, no am-pakahêlêk yay na.

²⁴ Wana etaman hêñ buwag, “Naburarêg pon ya angkahêlêk ko, ya tawoy ampammita, ay nanad kayo.”

25 Inapoap nan oman ni Apo Jesus ya mata nan lalaki. Kanan habayto, ay impakamukat nan lalaki ya mata na, haka alway nan naburarêg ya hêlêk na, ta ampakahêlêk yay nan mangêd.

26 Bayo nagtsipan hi Apo Jesus kana, ta wana, “Muli kay na, noa, paan kan magdann ha baryo.”

*Hinabi ni Pedro ya hi Apo Jesus, ay hiyay Mesias, ya Cristo, ya impangakon Mámiligtas
(Mateo 16:13-20; Lucas 9:18-21)*

27 Bayo nammitta hilan Apo Jesus palako ha balang baryo ya angkasakopan hên balayan Cesarea Filipos. Kaban ampita hila, ay kinotang nay tagahonol na, ya wana, “Hino ko kano?”

28 Kabay hinabi la, “Wanlan kaatag ya hika ay hi Juan Bautista. Noa, wanlan kaatag êt ya hika ay hi Propeta Elias. Hilay kaatag êt ay ampaghabin ya nabiyay oman ya miha kanlan unan mámipamwang hên an-ipaihip kanla ni Apo Namalyari.”

29 Wana êt kanla ni Apo Jesus, “Kamoyu etaman, hino ko ha ihip yo?” Wani Pedro etaman, “Hika ya Mesias, ya Cristo, ya impangakon Mámiligtas ya pinili ni Apo Namalyari hên mamaala.”

30 Noa, impapakabawal na hila hên ipamwang ha hinoman ya hiyay Cristo.

*Impamwang ni Apo Jesus ya hiyay patsêñ
(Mateo 16:21-28; Lucas 9:22-27)*

31 Bayo impamwang ni Apo Jesus kanlan tagahonol na, ya malyari kana lumatêng ya allo, ya wana, “Hiko ya Taga-Langit, ya In-anak Tawo, ay kailangan magdanas hên hadyay pamagdusa. Hikoy araêñ lan mánoron Kautuhan ni apo Moises.

Araêñ la kon toa ya nag tungkulon ha bansa, haka araêñ la ko êt hên ampamaala kanlan pari. Ipa-patsi la ko, noa, ha ikatlon allo ay biyayêñ akon oman.”

³² Impapakamulah ni Apo Jesus ya habayto kanla. Kabay indayo yan pêrad ni Pedro ta hinabyanan na ya, gawan êndat nan a patsêñ ya Mesias, ya Cristo.

³³ Noa, immarap hi Apo Jesus ha kaatag ya tagahonol na, bayo hinabyanan na hi Pedro, ya wana, “Pedro, paan mo kon tuksoêñ hên nanad ha pamanukso kangko ni Satanas! Ya pan-ihipêñ mo ay alwan kaihipan ni Apo Namalyari, noa, kaihipan hên tawo!”

³⁴ Bayo pinarani nay kal-atan hên kalamoy tagahonol na, ta wana kanla, “Hilay labay hên humonol kangko, ay dapat liwaan ya sarili lan kalabayan haka humonol kangko. Dapat nakal-an hilan magtêêh hên pamairap haka matsu, ya maialimbawa ha pamakay hên nabyat ya koros.

³⁵ Hila etaman ya a anhumonol kangko, gawan a la labay hên matsu o mangoman ya pamimiyay la, ay matsu etaman. Noa, hilay matsu gawan ha paniwala la kangko haka ha pamipamwang lan Mangêd ya Habi tungkol kangko, ay dyanan biyay ya ayn angga.

³⁶ Mikamihan man kanan mihay tawo ya pibadian di ha luta, ay a na mapakinabangnan ya habayto, no hiya etaman ay mipalako ha kaparusaan ya ayn angga!

³⁷ Yarin matanggap ya pibadian na, ta êmêñ a mipalako ha kaparusaan ya ayn angga ya kaêlwa na!

38 Hilay tawo amêhén ay taganán makasalanan, haka tinalibatokan la hi Apo Namalyari. No araén la ko, ya Taga-Langit, ya În-anak Tawo, haka no araén lay toro ko, ay araén ko hila êt ha pag-orong ko di. Ha pag-orong ko, ay atsi kangko ya kapahilêw ya kahampatan ni Apo Namalyari, ya Tatang ko, haka kalamo ko hilay anghel na.”

9

1 Inhundo ni Apo Jesus ya pamaghabi na kanlan tagahonol na, ya wana, “Pakagilamén yoy habaytsi, ya main ungno di kamoyu ya a matsi angga ha mahélék la, ya nilumaténg ya paman-lokop ni Apo Namalyari hên main kapangyarihan.”

Ampihahabi hi Apo Jesus, hi apo Moises, haka hi apo Elias

(Mateo 17:1-13; Lucas 9:28-36)

2 Hêñ nalabah ya anêm ya allo paubat hêñ hinabi nay habayto ni Apo Jesus, ay pinaglamo na hi Pedro, hi Juan haka hi Santiago, hêñ nilumakat ha matag-ay ya tawtgut hêñ kakapag la. Kaban atsi hila bayro, ay naoman ya itsura ni Apo Jesus.

3 Ya takop na ay nag-in bapan putsi ya kapahilêw, ya ayn kapantag ha kaputsian.

4 Namakonkaynaman ay main loway mâmipamwang ya an-ipaihip kanla ni Apo Namalyari ya ubat ha langit, ya hi apo Moises haka hi apo Elias ya kalamo ni Apo Jesus hêñ ampihahabi.

5 Bayo hinabi ni Pedro, ya wana, “Mánoro, mangéd ya atsi kitamo di. Manyag kay hêñ tatloy

hawong. Miha kamo, miha kan apo Moises, haka miha kan apo Elias.”

⁶ Hinabi nay habayto ni Pedro gawan nakatsi-gag ya haka hilan Juan.

⁷ Ampaghabi ya pon hi Pedro hēn inupungan hila hēn ginêm, haka main hilan nagilam ya habi ya ubat ha ginêm, ya wanana habi, “Hatsi ya anglugurê kon anak. Gilamênoy anhabiên na.”

⁸ Hēn tinunggêna habi, ay nanlêk hilan Pedro ha palibot, noa, mimiha na tana ni Apo Jesus ya angkahêlêk la.

⁹ Ha paglohan la hēn ubat ha tawtgug, ay impapakabawal ni Apo Jesus hilay habaytoy tattoy tagahonol na hēn ipamwang ha hinoman ya nahêlêk la ha tawtgug, angga ha a ya pon matsi haka mabiyay oman, ya hiya, ya Taga-Langit, ya In-anak Tawo.

¹⁰ Kabaya la impamwang ya habayto ha hinoman. Pinihahabian la no hinoy labay habiên ya mabiyay yan oman.

¹¹ Gawan nahêlêk la bayro ha tawtgug hi apo Elias, ay kinotang la ya, ya wanla, “Awta panhabiên lan mánoron Kautuhan ni apo Moises, ya kailangan mag-orong ya pon di ha luta hi apo Elias bayo ya lumatêng ya Mesias, ya Cristo, ya impangakon Mámiligas ya pinili ni Apo Namalyari hēn mamaala?”

¹² Wana etaman ni Apo Jesus, “Taganán nakahulat* ha habi ni Apo Namalyari ya main nanad kan apo Elias ya manléan hēn nakêm ha paman-lumatêng ko. Haka nakahulat† etaman ya hiko,

* **9:12** Malakias 4:5, 6. † **9:12** Isaias 53:3-12.

ya Taga-Langit, ya In-anak Tawo, ay araêñ haka dapat magtêéh hêñ hadyay pamagdusa.

¹³ Noa, anhabiên ko kamoyu, ya nilumatêng yay na ya nanad[‡] kan apo Elias, haka a la ya nabalyan, ya hiyay habayto ya lumatêng bayo ya lumatêng ya Mesias, ya Cristo, ta dinyag la kana, ya labay la, hêñ nanad ha impamwang ha Kahulatan[§] ya tungkol kana.”

Namipaplag hi Apo Jesus hêñ hinumapat hêñ ampamatugaw ha mihay anak ya lalaki

(Mateo 17:14-21; Lucas 9:37-43a)

¹⁴ Hêñ nakalohan hilay na ha tawgtug, hêñ marani hilay na ha andyanan lan kaatag ya tagahonol na, ay nahêlêk lay kal-atan ya nakapalibot kanla. Haka napansin la ya main mánoron Kautuhan ni apo Moises ya ampakihubak kanla.

¹⁵ Hêñ nahêlêk lan kal-atan hi Apo Jesus, ay nipag-êpapah hilan nuwayun nanupa kana.

¹⁶ Kinotang ni Apo Jesus hilay tagahonol na ya wana, “Hinoy ampiuhubakan yo?”

¹⁷ Wanan miha bayro, “Mánoro, gintan ko di kamo ya anak koy lalaki, ya anhapatan hêñ narawak ya a angkahêlêk, haka a yay na ampakahabi.

¹⁸ No andawhongêñ na yan anhumapat kana, ay an-itumba na ya ha luta, bayo maggalak ya bêbêy na. Ampag-ngê-ngêt ya, haka angkumdêy ya lawini na. Pinakihabi kina ha tagahonol mo ya paalihêñ lay hinumapat, noa, a la ya agyu hêñ paalihêñ.”

[‡] **9:13** Mateo 17:13. [§] **9:13** Malakias 4:5, 6.

19 Kabay wani Apo Jesus, “Hikaw ya angkabiyay amêhén ay ayn paniwala! Aydin angga kataw hén pakilamoan haka pakitagalán?” Bayo wana kanan lalaki, “Gêtan mo di ya anak mo.”

20 Gintan lay anak kan Apo Jesus. Hén nahélék na hi Apo Jesus, hén hatoy hinumapat kanan anak, ay impatumba nay anak hén imbuwad-buwad hén ampaggalak ya bêbêy.

21 Kinotang ni Apo Jesus ya toa nan anak, “Nakano yan unan hinapatan?”

Wanan toa na, “Paubat hén nanawa ya pon.

22 No andawhongén na ya, ay panay na yan an-itapon ha apoy, o an-ihugno ha lanêm ta patsén na ya dayi. Noa, no main kan madyag, ay ingalwan mo kay dayi, hén paalihén mo ya kana.”

23 Bayo wani Apo Jesus, “Pata nahabi mo, no main akon madyag? Hilay ampaniwala kan Apo Namalyari ay makadyag hén kaganawan!”

24 In-ikhaw nan inhabi hén toa nan anak, ya wana, “Ampaniwala ko! Noa, no main pamagkulang ha paniwala ko, ay pahanan mina dayi!”

25 Hén nahélék ni Apo Jesus ya kal-atan ya anlumaténg, ay namipaplag ya hén hinumapat kanan anak, ya wana, “Hika ya namatékk haka namaomêl kanan hata anak, ay mag-alíh ka kana, haka paan kay nan humapat kana!”

26 Hadyay angaw nan hinumapat kanan anak, intumba nay anak, haka hadyay pamibwad-bwad na kana, bayo inumalih yay na. Haka nanad hén bangkay ya lawini nan anak. Kabay êndat lan kal-atan ya natsi yay na.

²⁷ Noa, tinalan ni Apo Jesus ya gamêt na ta impairêng na ya, nirêng ya etaman ya anak.

²⁸ Hêñ nakahowêñ hilan Apo Jesus ha bali ya ampaidyanan la, ay kinotang la yan tagahonol na no awta a la ya napaalih ya hinumapat kanan anak.

²⁹ Wana etaman ni Apo Jesus, “Ya êmbayroy narawak ya a angkahêlêk, ay a mapaalih no alwan gawan ha pamanalangin.”

*Inoman nan hinabi ni Apo Jesus ya patsên ya
(Mateo 17:22-23; Lucas 9:43b-45)*

³⁰ Nag-alih hilan Apo Jesus bayro, haka nag-dann hila ha probinsyan Galilea, ta êmén ayn makamwang no antoy andyanan la,

³¹ ta antoroan nay tagahonol na, ya wana, “Hiko ya Taga-Langit, ya In-anak Tawo, ay i-upit ha kapatsi ko. Patsên la ko, noa, ha ikatlon allo, ay mabiyay kon oman.”

³² Noa, a la naintindihan hêñ tagahonol na ya habaytoy hinabi na. Malimo hila etaman hêñ mangotâng kana.

*No hino ya matag-ay ya tungkulan
(Mateo 18:1-5; Lucas 9:46-48)*

³³ Hêñ nilumatêng hilay na ha balayan Caper-naum, hêñ atsi hilay na ha mihay bali, ay kinotang ni Apo Jesus hilay tagahonol na no hino ya pini-huhubakan la ha dann.

³⁴ Noa, ayn kanla ya naghabi, gawan marêng-êy hila ta pinihuhubakan la no hino kanla ya matag-ay ya tungkulan.

³⁵ Nikno hi Apo Jesus, ta binaêg na hilay labin-loway tagahonol na hêñ dumani kana, ta wana

kanla, “Hilay labay mag-in matag-ay, ay kailangan magpakaaypa hēn maghuyo kanlan ampan-gailangan hēn hawop.”

³⁶ Binaēg nay mihay anak ya nanawa hēn mirēng ha arapan la ta tinakēh na ya, bayo wana kanlan tagahonol na,

³⁷ “Hinoman ya ampaniwala kangko, ya ampananggap kanlan maaypa ya nakēm nanad hata anak, hēn gawan habaytoy paniwala la kangko, ay nanad hiko ya antanggapēn la. Hila etaman ya ampananggap kangko, ay antanggapēn la hi Apo Namalyari ya namiutoh kangko.”

Hilay a ampanalanghang kantamo, ay ampanawop kantamo

(Lucas 9:49-50)

³⁸ Wani Juan kan Apo Jesus, “Manoro, nahēlēk naēn ya mihay lalaki ya ampanggamit hēn langan mo ha pamaalih hēn nangarawak ya a angkahēlēk. Binawal naēn ya gawan alwa tamo yan kalamo.”

³⁹ Noa, wani Apo Jesus kana, “Paan yo yan bawalēn, ta ayn manyag hēn kapapaēpapah ha langan ko, bayo maghabin halanghang kangko.

⁴⁰ Hilay a ampanalanghang kantamo ay ampanawop kantamo.

⁴¹ Pakagilamēn yo! Hilay mam-i kamoyu hēn mihay baso hēn lanēm, gawan hikaw ay ambaēgēn tagahonol ko, ay taganān tumbahan hila etaman ni Apo Namalyari hēn kangēran.”

Ya pangubatan hēn pamanyag kasalanan

(Mateo 18:6-9; Lucas 17:1-2)

⁴² Inhundo ni Apo Jesus ya pamaghabi na, ya wana, “Hinoman ya pangubatan hēn pamanyag

kasalanan hēn mihay maaypa ya nakêm hēn nanad kanan hata nanaway anak ya ampaniwala kangko, ay mangêd pon kana, ya bayo ya mag-in pangubatan hēn habayto, ay patsêñ ya hēn êl-an yan mahlay ya bato ha lêyê na, ta ilêmêh ha malalê ya lanêm.

⁴³ No gamêt mo ya anggamitên mon manyag kasalanan, ay mangêd ya potohêñ mo ya habayto. Ta mangêd pon ya milamo ka ha biyay ya ayn angga ha langit, hēn ayn gamêt, kanan mipalako ka ha impiyerno ha apoy ya ayn angga, hēn main gamêt.

⁴⁴ (Bayro ha apoy ya ayn angga, ay main owêl ya a angkamatsi ya mangna kanlan mipalako bayro.)*

⁴⁵ No bitsih mo ya anggamitên mon manyag kasalanan, ay mangêd ya potohêñ mo ya habayto. Ta mangêd ya milamo ka ha biyay ya ayn angga ha langit, hēn ayn bitsih, kanan mitapon ka ha impiyerno, hēn main bitsih.

⁴⁶ (Bayro ay main owêl ya a angkamatsi ya mangna kanla.)†

⁴⁷ No mata mo ya anggamitên mon manyag kasalanan, ay kêwêtêñ mo haka mon itapon. Ta mangêd ya milamo ka ha biyay ya ayn angga ha langit, hēn ayn mata, kanan mitapon ka ha impiyerno, hēn main mata.

⁴⁸ Bayro ha impiyerno ay main owêl ya a angkamatsi ya mangna kanla, haka ya apoy bayro ay a angkaparê.

* **9:44** Habaytsi ay ayn ha kaatag ya Kahulatan Griego. † **9:46** Habaytsi ay ayn ha kaatag ya Kahulatan Griego.

49 “Ya balang miha ay magdanas hēn kairapan, ta êmēn mag-in mangêd ya ugali la. Habayto ay nanad ha kēna ya dinyanan ahin, bayo imparann ha apoy.

50 Mangêd ya ahin. Noa, no naalihan yay nan alat, ay ahinan maiorong ya alat na. Ihipêñ yoy pamanggamit hēn ahin. Dapat panay kaw mag-in nanad ahin ya a naalihan, ta êmēn main kap-atêkbêkan ya pamilalamo yo.”

10

Intoro ni Apo Jesus ya tungkol ha pamihiyay hēn miahawa

(Mateo 19:1-12; Lucas 16:18)

1 Amêhēn, ay immalih hilan Apo Jesus bayro ha probinsyan Galilea, ta nagdann hilay na ha probinsyan Judea, hēn nilumipay ha Ilog Jordan. Kal-atan ya nagtsipon hēn nagpatoro kana. Tinoroan na hila etaman hēn nanad ha panay nan andaygên.

2 Main ungnoy Pariseo bayro ya napaidani kan Apo Jesus, ya labay mandakêp kana ha pamaghabi na. Kabay nangotang hila kana, ya wanla, “Malyari ha mihay lalaki hēn ihiyay nay ahawa na, hinoman ya pagbad-an?”

3 Nangotang hi Apo Jesus, “Hinoy utoh ni apo Moises ya tungkol bayro?”

4 Wanla etaman, “Pinaulayan ni apo Moises ya lalaki hēn mamihiyay hēn ahawa la no main hilay nan kahulatan ya an-ihiyay lay ahawa la.”

5 Wanay na êt ni Apo Jesus, “Gawan ha kakdêyan ulo yo, ha a yo labay humonol ha kalabayan ni Apo

Namalyari, ay kabay nanulat hi apo Moises hēn habaytoy utoh.

6 Noa, hēn haton lagi, hēn dinyag ni Apo Namalyari ya luta, ay nanyag yan lalaki, haka nanyag ya êt hēn babayi.*

7 Kabay lakwanan nan lalaki ya toa na, ta milamo hilay nay miahawa.

8 Hilay miahawa ay mag-in mimiha,† kabay alwa hilay nan lowa, ta mimiha hila tana.

9 Ya pinilamo ni Apo Namalyari, ay dapat a pihiyayê."

10 Hēn nilumatêng hilan Apo Jesus ha ampaidyanan la, ay hilay tagahonol na etaman ya nangotang kana, no hinoy labay habiêñ hēn habaytoy hinabi na.

11 Kabay hinabi ni Apo Jesus, ya wana, "Ya lalaki ya mamihiyay hēn ahawa na, bayo mag-ahawa yan kaatag, ay nanyag kasalanan ha una nan ahawa gawan namabayi ya.

12 Embayro êt ya babayi ya nakihiyay ha ahawa na, bayo makiahawa ha kaatag ya lalaki, ay nanyag kasalanan gawan nakilalaki ya."

*Inhalangin ni Apo Jesus ya nanganaway anak
(Mateo 19:13-15; Lucas 18:15-17)*

13 Nanganaway anak man, ay anggêtan kan Apo Jesus, ta ihalangin na hila hēn ipalunto nay gamêt na ha ulo la. Hēn nahêlêk lan tagahonol ni Apo Jesus ya hata manianak-anak, ay binawal lay am-pantan kanla.

* **10:6** Genesis 1:27. † **10:8** Genesis 2:24.

14 Noa, hēn napansin ni Apo Jesus, ya angkalyari, ay hinuluk nay tagahonol na, ya wana, “Paulayan yo hilay anak hēn paidani kangko. Paan yo hilan bawalēn. Ta hilay maaypa ya nakēm ya nanad kanla, ay hila ya ilamo ha pamanlokop ni Apo Namalyari.

15 Pakagilamēn yoy hatsi. Hilay a manoto ha paniwala lan nanaway anak ha pagpalokop la kan Apo Namalyari, ay a makapakilamo ha pamanlokop na.”

16 Tinakēh nay manianak-anak, bayo impalunto nay gamēt na ha ulo la, ta inhalangin na hila.

Ya mihay mabandi, ya Israelita, ya nangotang no hino ya dapat nan daygēn ta êmēn ya madyanan biyay ya ayn angga

(Mateo 19:16-30; Lucas 18:18-30)

17 Hēn paalih hilan Apo Jesus, ay main mihay lalaki ya nuwayun dinumani hēn nandoko ha arapan na hēn nangotang, “Mangēd ya Mánoro, hino ya dapat kon daygēn, ta êmēn ako madyanan hēn biyay ya ayn angga?”

18 Wani Apo Jesus kana, “Pata binaēg mo kon mangēd? Hi Apo Namalyarin bēngat ya mangēd.

19 Muwang moy Kautuhan ni Apo Namalyari, ‘Paan mamatsin kaparehon tawo. Paan mamabayi. Paan makilalaki. Paan manakaw. Paan manistigos ha alwan pêtēg. Paan manloko. Galangēn moy toa mo.’ ”

20 Bayo wanana lalaki, “Mánoro, anhonolēn kina ya habayto ngan, paubat hēn nanawa ko pon.”

21 Hēn nagilam ni Apo Jesus ya hinabi na, ay hinlēk na ya lalaki hēn main pamanlugud,

ta wana, “Miha pon ya kailangan mon daygên. Iubuh mon ihaliw ya pibandian mo, bayo idin moy habaytoy naablian kanlan mangairap, ta madyanan kan mantêg hêñ pibandian ha langit. Pangayari mon madyag ya habayto, ay mag-orong ka di, ta humonol ka kangko.”

²² Noa, hêñ nagilam nay hinabi ni Apo Jesus, ay ayn yay nan higla haka nammita ya hêñ ampaglunkot, ta miha yay mabandi.

²³ Hinlêk ni Apo Jesus hilay tagahonol na, bayo wana kanla, “Alwan nataluh hêñ makapakilamo ha pamanlokop ni Apo Namalyari ya hilay mabandi!”

²⁴ Angkalipang ya ihip lan tagahonol na ha hinabi na. Noa, inoman nan hinabi ni Apo Jesus, “Hikaw ya nanad anak ko, alwan nataluh hêñ makapakilamo ha pamanlokop ni Apo Namalyari!

²⁵ Nataluh hêñ magdann ha lubot karayêm ya mihay kamelyo, kanan makapakilamo ha pamanlokop ni Apo Namalyari ya mihay mabandi.”

²⁶ Angkalipang ya ihip lan tagahonol na ha hinabi na, kabay nipakotang hila, “Hino awud ya miligtas, hêñ makapakilamo ha pamanlokop ni Apo Namalyari?”

²⁷ Pinakahêlêk hila ni Apo Jesus, bayo wana, “Ya a madyag hêñ tawo, ay madyag ni Apo Namalyari.”

²⁸ Amêhêñ, wani Pedro, “Ay-êmêñ kay, ya tagahonol mo? Imbalag naêñ ya kaganawan, ta êmêñ kay humonol kamo.”

²⁹ Wana etaman ni Apo Jesus, “Hilay nangibalag bali la, kapotoh pohêl la, toa la, anak la, haka

luta la, gawan ha pamanhumonol la kangko, hēn maypamwang hēn Mangangēd ya Habi ya tungkol ha kaligtasan,

³⁰ ay matumbahan hēn katamagatoh kanan imbalag la. Kaban atsi hila pon di ha luta, ay matumbahan hilan bali, kapotoh pohēl, indo, anak haka luta. Pairapan hilan kaatag, noa, lano, ay madyanan hila hēn biyay ya ayn angga.

³¹ Noa, mal-at kanlan matag-ay ya tungkulan ha hēlēk hēn kapareho la, ay alwan matag-ay ha hēlēk ni Apo Namalyari, haka mal-at kanlan maaypa ya tungkulan ha hēlēk hēn kapareho la, ay matag-ay ha hēlēk ni Apo Namalyari.”

*Ikatlon pangungkat ni Apo Jesus, ya patsēn ya
(Mateo 20:17-19; Lucas 18:31-34)*

³² Hēn atsi hila ha dann, hilan Apo Jesus, hēn palako ha balayan Jerusalem, ay angkauna hi Apo Jesus ha pammita la. Ampag-êpapah hilay tagahonol na, haka hilay kaatag ya ampakihonol kanla, ay angkalimwan, gawan muwang lay main labay mamatsi kan Apo Jesus bayro ha Jerusalem. Amēhēn, impapawa nay labinloway tagahonol na, ta impamwang na kanlan bēngat ya malyari kana,

³³ ya wana, “Pakagilamēn yo! Anlumakat kitamo ha Jerusalem ta hiko, ya Taga-Langit, ya Inanak Tawo ay i-upit bayro ha gamēt lan mānoron Kautuhan ni apo Moises, haka kanlan ampamaala kanlan pari. Habiēn lan habayto ya hikoy dapat patsēn, bayo idin la ko kanlan alwan Israelita.

³⁴ Musmusēn, dul-an, haka pagpapatokēn la ko, bayo patsēn la ko. Noa, ha ikatlon allo, ay mabiyay kon oman!”

Labay ni Santiago haka ni Juan, ya lowa kanlan tagahonol ni Apo Jesus, ya paiknoën hila ha dani na (Mateo 20:20-28)

³⁵ Dinumani hēn nangotang kan Apo Jesus ya loway anak ni Zebedeo, ya hi Santiago haka hi Juan, ya wanla, “Manoro, main kay dayin pakihabi kamo.”

³⁶ Wani Apo Jesus etaman, “Hinoy labay yo kangko?”

³⁷ Wanla etaman kana, “Labay naên, ya lano ha pamanlokop mo, ay paiknoën mo kay ha dani mo, ya miha ha dapit panabtab, haka miha êt ha dapit uki.”

³⁸ Wani Apo Jesus kanla, “A yo angkaintindihan ya pamagdusa ya maranasan yo, no mahonol ya kalabayan yo. Matêêh yoy pamagdusa ya danasên ko? Taganán nakal-an kaw hēn matsi hēn nanad kangko?”

³⁹ Wanla etaman kana, “Awo. Nakal-an kay.” Kabay wani Apo Jesus kanla, “Madanasan yoy pamagdusa ya danasên ko, haka matsi kaw hēn nanad kangko.

⁴⁰ Noa, ayn akon karapatan hēn maghabi no hinoy mikno ha dani ko, ta tinalagá nay na ni Apo Namalyari no hinoy mikno ha dani ko.”

⁴¹ Hēn nagilam lan mapoy kaatag ya tagahonol na, ya labay ni Santiago haka ni Juan, ay hinumuluk hila.

⁴² Kabay pinarani na hila ni Apo Jesus, ta wana kanla, “Muwang yo ya hilay manungkul lan a ampagpalokop kan Apo Namalyari, ay andaygén lan ipoh ya angkalokopan la, haka an-iatay la hilan manyag kalabayan la.

43 Noa, dapat alwan êmbayro ya daygén yo. No labay yon mag-in matag-ay ya tungkulan, ay dapat yon huyuén ya kapareho yon tawo.

44 Ya labay mag-in pinakamatag-ay ya tungkul-an, ay dapat mag-in nanad ipoh hên kalamo na.

45 Ta hiko man ya Taga-Langit, ya In-anak Tawo, ay atsi bayri amêhén ha luta, alwan para paghuyuan, noa, para maghuyo angga ha idin koy biyay ko, ha pangakbus hên kal-atan.”

Namamatkat hi Apo Jesus hên mihay buwagyah i Bartimeo

(*Mateo 20:29-34; Lucas 18:35-43*)

46 Amêhén, nilumatêng hilan Apo Jesus ha balayan Jerico. Hên paalih hila bayro ha balayan, hên kalamo hilay kal-atan, ay main buwag ya ampikno ha danin dann, ya ampakikwan pera. Ya langan na ay Bartimeo, ya anak ni Timeo.

47 Hên nagilam nay ampanlibah hi Apo Jesus ya taga-balayan Nazaret, ay nan-angaw ya, ya wana, “Apo Jesus, ya kaapo-apoan ni Arin David, ingalwan mo ko dayi!”

48 Binawal yan maglabak hên hatoy kal-atan ya ampakihonol kan Apo Jesus, noa, impakakhaw nan in-angaw, “Kaapo-apoan ni Arin David, ingalwan mo ko dayi!”

49 Hên nagilam ni Apo Jesus ya angaw na, tinunggén ya, ta main yan in-utoh, hên akayén lay buwag hên ilako kana. Hinabi la kanan buwag, “Pakhawén moy nakêm mo! Mirêng ka ta im-paakay na ka kana.”

50 Tampol yan nirêng. Imbalag nay pangkêbêl na, ta nagpaakay ya ha dani ni Apo Jesus.

⁵¹ Nangotang hi Apo Jesus kana, “Hinoy labay mon daygén ko kamo?” Amêhén, wanán buwag, “Panginoon, labay ko dayin makahélék.”

⁵² Kabay hinabi ni Apo Jesus kana, “Makahélék ka, gawan ha paniwala mo kangko. Malyari kay nan mita.” Tambéng ya etaman nakahélék, kabay nakihonol yay na kan Apo Jesus.

11

Mal-at ya ampapguri kan Apo Jesus hên ampan-daraho yay na ha balayan Jerusalem

(Mateo 21:1-11; Lucas 19:28-40; Juan 12:12-19)

¹ Nahén narani hilan Apo Jesus ha Jerusalem, ha talindah hên Tawgtug Olibo, hên angkadungawan lay balayan Betfage, haka baryon Betania, ay im-pauna ni Apo Jesus ya lowa kanlan tagahonol na,

² ta wana kanla, “Muna kaw ha balayan ha un-aan tamo. Panhumwén yo ha balayan, ay tampol yon mahélék ya mihay biseron asno, ya nakah-êl, ya a pon nahakyan. Okalén yoy habayto, ta gêtan yo di.

³ No main mangotáng kamoyu no awta an-okalén yoy habayto, ay habiên yo, ‘Kailangan yan Panginoon haka tampol nan ipaorong di.’”

⁴ Kabay nammita hilay nay loway in-utoh na. Haka natapol la etaman ya biseron asno ya nakah-êl ha mihay ilwangan ha danin dann. Kaban an-okalén la ya,

⁵ ay main ungnoy nangotang, “Pata an-okalén yoy habain ya bisero?”

⁶ Impamwang la ya hinabi ni Apo Jesus kanla. Kabay pinaulayan hila etaman.

7 In-akay lay nay bisero kan Apo Jesus, haka la inamakan pangkêbêl la, bayo himmakay hi Apo Jesus.

8 Inhundo lan Apo Jesus ya pammita lan palakon Jerusalem. Ha pandanan lan Apo Jesus, ay nami-amak hilay atsi bayro hên pangkêbêl la o bulong, gawan ha panggalang la kana.

9 Hilay atsi ha unaan ni Apo Jesus haka hilay anhumonol kana ay nipaŋ-angaw, “Hosanna! Iningalwan ya habaytsi ya in-utoh ni Apo Namalyari!

10 Iningalwan ya anlumatêng ya pamamaala nan kaapo-apoan ni Arin David! Hosanna! Purién hi Apo Namalyari!”

11 Hêñ nilumatêng hilan Apo Jesus ha Jerusalem, ay nagpakha ya ha Templo. Inubuh nan hinlêk ya angkalyari bayro. Gawan anyumabi yana, ay immawah ya ta nag-orong ya ha baryon Betania, hêñ kalamo nay labinloway tagahonol na.

*Inhumpa ni Apo Jesus ya mihay poon igos
(Mateo 21:18-19)*

12 Pangamaranon hêñ mag-orong hilan Apo Jesus ha balayan Jerusalem hêñ ubat ha Betania, ay nilonoh hi Apo Jesus.

13 Hêñ naipatanêh nay mihay poon igos ya nagbulong, ay dinanian nan hinlêk no main tagêy. Noa, bulong bêngat ya nalatngan na gawan alwa pon panaon tagêy.

14 Kabay wana kanan kayo, “Angga-angga, ay a kay na managêy oman!” Nagilam lan tagahonol na ya hinabi na.

Namitaboy hi Apo Jesus hēn ampipagtinda ha Templo

(*Mateo 21:12-17; Lucas 19:45-48; Juan 2:13-22*)

¹⁵ Hēn nilumatēng hilan Apo Jesus ha Jerusalem, ay nagpakha ya ha Templo. Intaboy na hilay ampi-pagtinda haka ampipanaliw bayro. In-iitwag nay lamisaan lan māmihagili hēn pera, haka in-iitwag na êt ya iknoan lan māmihaliw hēn pati-pati ya gamitēn ha átang.

¹⁶ Binawal na hilay ampangalga, hēn magdann bayro ha Templo.

¹⁷ Haka na hila tinoroan ya kal-atan, ya wana kanla, “Nakahulat ha habi ni Apo Namalyari, ya wanana hulat, ‘Ya bali ko, ay ambaêgêñ balin panalanginan para ha balang bansa.’* Noa, dinyag yo yan logal† ya panlokoan yon kapareho yo!”

¹⁸ Hēn nagilam lan mánoron Kautuhan ni apo Moises, haka hilay ampamaala kanlan pari, ya tungkol ha hinabi haka dinyag ni Apo Jesus, ay pinihabian la no hinoy maibara la kana, ta êmēn la ya mapatsi. Angkalimo hila kana, gawan ha kal-atan ya ampag-épapah ha pamanoro na.

¹⁹ Hēn anyumabi yana, ay nag-alíh hilan Apo Jesus bayro ha balayan Jerusalem.

Ya toro ya makwa ha nayangoy kayon igos ya inhumpa

(*Mateo 21:20-22*)

²⁰ Pangamaranon, hēn nagdann hilan Apo Jesus bayro ha inhumpay poon kayon igos, ay nayangoy na ya habayto.

* **11:17** Isaias 56:7. † **11:17** Jeremias 7:11.

²¹ Napanêmtêman ni Pedro ya inhumpa ya kayo, kabay wana, “Manoro, hêlkên mo! Nayangoy nay inhumpa moy kayo!”

²² Wani Apo Jesus, “Maniwala kaw kan Apo Namalyari.

²³ Pakagilamên yo, no main mamiutoh kanan hata tawtgug hêñ mitapon ya ha dagat, no ampaniwala ya, hêñ ayn pamikakono, ay itapon nay na ni Apo Namalyari ha dagat.

²⁴ Kabay, pakagilamên yo, no ampaniwala kaw, ay matanggap yoy hinoman ya pakikwaan yo ha panalangin.

²⁵ Haka bayo kaw manalangin, ay patawarêñ yo pon hilay nakadyag kasalanan kamoyu, ta êmêñ na kaw etaman patawarêñ ni Apo Namalyari, ya Tatang tamo ha langit.

²⁶ Noa, ta no a yon patawarêñ ya nakadyag kasalanan kamoyu, ay a na kaw patawarêñ ni Apo Namalyari, ya Tatang tamo ha langit.”

*No antoy ubatan hêñ tungkulan ni Apo Jesus
(Mateo 21:23-27; Lucas 20:1-8)*

²⁷ Hêñ atsi hilay nan oman ha Jerusalem hilan Apo Jesus, hêñ ampibita-bitâ ya ha Templo, ay dinumani kana hilay máñoron Kautuhan ni apo Moises, hilay toa ya nag tungkulan ha bansa, haka hilay ampamaala kanlan pari.

²⁸ Hinabi la kana, “Habién mo kannaêñ no hinoy tungkulan mo hêñ manyag hêñ pandaygêñ mo. Habién mo êt no hinoy nam-i kamo hêñ habain ya tungkulan.”

²⁹ Kabay wani Apo Jesus, “Main ako pon hêñ kotangêñ kamoyu. No pakibatan yo ko, ay habién

ko kamoyu no hinoy nam-i kangko hēn tungkulan hēn manyag hēn pandaygēn ko.

³⁰ Hinoy nam-i hēn tungkulan kan Juan Bautista hēn mamawtismo? Hi Apo Namalyari o tawo?”

³¹ Kabay pinihahabian la, ya wanla, “Hinoy habiēn tamo? No habiēn tamo ya ‘Ubat kan Apo Namalyari ya tungkulan ni Juan Bautista,’ ay habiēn na bayto, ‘Pata a yo yan pinaniwal-an?’

³² Noa, no habiēn tamo ya ‘Ubat ha tawo,’ ay hino kaya ya daygēn lan kal-atan kantamo, ta ha ihip la, hi Juan ay mihay propeta ni Apo Namalyari.”

³³ Kabay hinabi la kan Apo Jesus, ya wanla, “A naēn muwang no antoy ubatan tungkulan ni Juan Bautista.” Bayo wani Apo Jesus, “No êmbayro awud, ay a ko etaman habiēn kamoyu no antoy ubatan tungkulan ko.”

12

*In-alimbawa ni Apo Jesus ya sarili na ha anakya anlugurēn ya pinatsi, haka ha bato ya intapon
(Mateo 21:33-46; Lucas 20:9-19)*

¹ Amêhēn, nangalimbawa yay na êt hi Apo Jesus, ya wana kanlan ampanggilam, “Minghan main lalaki ya nag luta ya tinamnan nan ubas. Bayo binakoran nay habayto. Nangali yan panguniaban hēn ubas, haka ya êt namairēng hēn tawer ya pagbantayan. Impatsiwala na ha kaatag ya ubasan na, ta maglaêh ya ha kaatag ya bansa.

² Hēn pamutsi hēn habaytoy ubas, ay in-utoh nay mihay ipoh na, hēn kowēn ya atag na kanlan paypaniwal-an ubasan na.

³ Noa, dinakêp haka tinumbuk lay ipoh na, bayo impaorong la ya, hên ayn anggêtan.

⁴ Kabay in-utoh nay na êt ya kaatag ya ipoh na, noa, pinatok lay ulo na, impakarêng-êy la ya, bayo impaorong la ya hên ayn anggêtan.

⁵ Nahêñ in-utoh nay na êt ya ikatlon ipoh na, ay pinatsi la ya. Mal-at êt ya ipoh ya in-utoh na. Ya kaatag kanla ay tinumbuk la, haka ya kaatag, ay pinatsi la.

⁶ Hêñ ayn yay nan ipoh ya maiutoh, ya nag ubasan, ay in-utoh nay anlugarûn nan anak nay lalaki, ta wana, ‘Siguradon igalang lay anak ko.’

⁷ Noa, hêñ nahêlêk lan paypaniwal-an ubasan ya anak nan nag ubasan, ay nihahabi hila, ya wanla, ‘Hatsi ya paypamanaan na hêñ ubasan. Patsêñ tamo ya, ta êmêñ mapagbandi tamo ya hata ubasan na.’

⁸ Kabay dinakêp la ya, haka pinatsi, bayo in-hamwag lay bangkay na ha luwal hêñ ubasan.”

⁹ Amêhêñ, kinotang ni Apo Jesus, hilay ampamaala ha Templo, ya wana, “Hino kaya ya daygêñ hêñ nag ubasan kanlan paypaniwal-an nan ubasan? Siguradon lakwêñ nay paypaniwal-an nan ubasan, ta patsêñ na hila, bayo ipatsiwala nay ubasan na ha kaatag.”

¹⁰ Wana êt ni Apo Jesus kanlan ampamaala ha Templo, “Yarin a yo êt nabaha ya habaytsi ya nakahulat ha Kahulatan ya impahulat ni Apo Namalyari?

‘Ya bato ya intapon lan manyag bali,
ay nag-in pinakamaalagáy bato
ta êmêñ mag-in napah-êy ya bali.

11 Dinyag ni Apo Namalyari ya habayto ya kapa-paêpapah.’’*

12 Naintindihan lan ampamaala ha Templo, ya hilay in-alimbawa di ha manyag bali, haka ha nangarawak ya paypaniwal-an ubasan, kabay labay la yan dakpêñ, noa, malimo hila ha kal-atan. Kabay nammita hilay na.

Ya pamayad hên buwih

(*Mateo 22:15-22; Lucas 20:20-26*)

13 Bayo namiutoh hilan ungnoy Pariseo haka ungnoy kagampi ni Herodes Antipas, ya waringan main hilan labay mamwangan kan Apo Jesus. Noa, labay la yan madakêp ha pamaghabi na.

14 Hêñ nilumatêng hila kan Apo Jesus, ay hinabi la, “Mánoro, muwang naén ya kaptêgan ya panhabiên mo haka panoro mo. An-itoro moy kalabayan ni Apo Namalyari, ha hinoman ya am-panggilam, gawan alwa kan mapamili, ta pantag ya panlêk mo ha balang miha. Kabay main kay hêñ labay mamwangan kamo. Ayon ha Kautuhan ni apo Moises, ay malyarin mam-in buwih kanan Emperador o ahê?”

15 Noa, muwang ni Apo Jesus ya pagbabara la, kabay hinabi na kanla, ya wana, “Pata labay yo kon dakpêñ ha pamaghabi ko! Ipahlêk yo kangko ya mihay sintimos hêñ pilak.”

16 Namiawah hilan habayto, bayo kinotang na hila. “Hinoy nag lupa hêñ angkakit yo bahêñ? Hinoy nag langan ya nakahulat bahêñ?” Hinabi la etaman, “Kanan Emperador.”

* **12:11** Awit 118:22-23.

¹⁷ Kabay wani Apo Jesus, “No êmbayro awud, ay idin yo kanan Emperador ya kana, haka idin yo kan Apo Namalyari ya kan Apo Namalyari.” Hêñ nagilam lay hinabi na, ay nag-êpapah hila.

*Ya kotang ya tungkol ha pangabiyay oman
(Mateo 22:23-33; Lucas 20:27-40)*

¹⁸ Amêhêñ, ay main ungro ha mihay pangkat lan Israelita ya ambaêgêñ Saduseo ya dinumaní kan Apo Jesus. Hilay Saduseo ay a ampaniwala ha pangabiyay oman. Haka hinabi la kan Apo Jesus, ya wanla,

¹⁹ “Mánoro, nanulat ya hi apo Moises ha Kautuhan hêñ para kantamo, ya wanana hulat, ‘No main mitaahawa, ta natsi ya lalaki hêñ a hila nagkaanak, ay dapat ya kahonol nan natsi, ay ipaahawa kanan bawo. No magkaanak hila, ay habaytoy anak, ay itad anak na hêñ natsi.’

²⁰ Minghan, ay main pitoy mikakahonol ya lalaki. Nakapag-ahawa ya punganay, noa, natsi ya hêñ a nagkaanak.

²¹ Bayo pinag-ahawa nan humonol ha punganay ya hata bawo, noa, natsi ya etaman ya humonol ha punganay hêñ a nagkaanak. Êmbayro êt ya nalyari ha ikatlon kahonol.

²² Balang miha kanlan pitoy mikakahonol ay nakapag-ahawa hêñ hata babayi, noa, naubuh hilan natsi hêñ a nagkaanak. Bayo natsi ya êt ya hata bawo.

²³ Amêhêñ, ha allon pangoman mabiyay, hinoy nay taganán mag-in ahawa nan hata babayi, ta balang miha kanlan habaytoy pitoy mikakahonol ay nag-in ahawa na?”

²⁴ Kabay wani Apo Jesus kanlan Saduseo, “Mali ya paniwala yo, ya a biyayêñ oman ya natsi, gawan a yo angkaintindihan ya Kahulatan ya impahulat ni Apo Namalyari haka a yo angkaintindihan ya kapangyarihan na!

²⁵ Ha pangoman biyayêñ hilay natsi, ay ayn nanan pamag-ahawa, ta manoto hila kanlan anghel ha langit ya a ampag-ahawa.

²⁶ Ya hulat man ni apo Moises ay ampamaptêg ya biyayêñ oman hilay natsi, ta bayro ha hulat na, ya tungkol ha maaypa ya kayoy andungkêt, mabáha tamo ya hinabi ni Apo Namalyari, ‘Hikoy Diyos ni Abraham, Diyos ni Isaac, haka Diyos ni Jacob.’[†]

²⁷ Habaytoy labay habiêñ ya hiyay Diyos lan angkabiyay, ta balang miha ya natsi, ay angkabiyay ha hêlêk na. Mali ya paniwala yo, ya a biyayêñ oman ya natsi.”

*Ya pinakamaalagá ya utoh ni Apo Namalyari
(Mateo 22:34-40; Lucas 10:25-28)*

²⁸ Main mónoron Kautuhan ni apo Moises ya nakagilam hên pamakipagpalinawan la. Hên napansin na, ya mangêd awud, ya hinabi ni Apo Jesus, ay nangotang ya, “Mánoro, hinoy pinakamaalagá ha utoh ni Apo Namalyari?”

²⁹ Hinabi ni Apo Jesus, “Ya pinakamaalagá utoh ni Apo Namalyari, ay ‘Manggilam kaw ya Israelita. Mimihay Panginoon tamo, yabay ya hi Apo Namalyari, ayn nanan kaatag.

³⁰ Lugurên mo hi Apo Namalyari, ya Panginoon hên boon nakêm, boon ihip, haka boon hêkaw’.

[†] **12:26** Exodus 3:6.

31 Ya ikalwa ay, ‘Lugurên moy kapareho mo hêñ nanad pamanlugud mo ha lawini mo.’ Ayn kaatag ya utoh ya maalagá kanlan habaytoy lowa.”

32 Wanan mánoron Kautuhan ni apo Moises, “Taganán pêtêg ya hinabi mo ya mimihay Panginoon tamo, yabay ya hi Apo Namalyari, ayn nanan kaatag.

33 Haka muwang ko ya maalagá ya lugurên tamo ya hêñ boon nakêm, boon ihip, haka boon hêkaw. Dapat tamo etaman hêñ lugurên ya kapareho tamo hêñ nanad ha pamanlugud tamo ha lawini tamo. Maalagá ya habayto kanan hinon imparaya o in-átang kana.”

34 Nadambi ni Apo Jesus ya main kagalingan ya hinabi nan mánoron Kautuhan ni apo Moises, kabay wana kana, “Marani ka ha pamanlokop ni Apo Namalyari, ta pérad tana ay palokop ka kana.” Marêng-êy hilay na hêñ mangotáng pon kan Apo Jesus, hilay labay hêñ mandakêp kana ha pamaghabi na.

Hi Cristo, ya Mesias, ay alwan bêngat kaapo-apoan ni Arin David, noa, hiyay Panginoon ni Arin David etaman

(Mateo 22:41-46; Lucas 20:41-44)

35 Kaban ampanoro ya hi Apo Jesus ha Templo, ay nangotang ya, “Ay-êmêñ lan mahabi lan mánoron Kautuhan, ya Mesias, ya Cristo, ya impangakon Mámiligtas ya pinili ni Apo Namalyari hêñ mamaala ay kaapo-apoan bat ni Arin David?

36 Mismon hi Arin David, ya ninuno tamo, ay namihulat ha Kahulatan ha kapangyarihan nan

Espiritu ni Apo Namalyari, hēn tungkol ha Mesias, ya Cristo, ya wana,
 ‘Hinabi ni Apo Namalyari ha Panginoon ko,
 “Mikno ka ha dapit panabtab ko hēn mamaala hēn
 kalamo ko,
 angga ha mahambut ko hilay kapatsi mo,
 ta idin ko hila ha aypan kapangyarihan mo.” ’ ’‡
 37 Wana êt ni Apo Jesus, “Hēn hato, ay hi Arin David ya namaêg hēn ‘Panginoon ko’ ha Mesias, ya Cristo, ya impangakon Mámiligtas ya pinili ni Apo Namalyari hēn mamaala. Kabay muwang tamo, ya hiyay Panginoon haka kaapo-apoan ni Arin David.” Hadyay kahiglaan lan kal-atan hēn manggilam hēn toro na.

Kaillag ha toro lan mánoron Kautuhan ni apo Moises
(Mateo 23:1-36; Lucas 20:45-47)

38 Inhundo ni Apo Jesus ya panoro na, ya wana, “Kaillag kaw ha toro lan mánoron Kautuhan ni apo Moises. Labay-labay la hēn mibita-bitia hēn nakatakop hēn makarang ya takop, ta êmén ipamwang ya matag-ay ya tungkulon la. Labay la êt hēn galangén, haka dayêwén hila hēn kal-atan ha balayan.

39 Ya kaatag pon ya andaygén la ta êmén ipamwang ya matag-ay ya tungkulon la, ay ampilién lay pinakamangêd ya iknoan ha sinagoga haka ha kaluto.

40 Anlokoén la êt ya bawo ya babayi, ta êmén la makwa ya pibandian la, bayo magma-mangêd

‡ 12:36 Awit 110:1.

hilan ikarang ya panalangin la ha arapan hēn kalan. Kabay hadyay pamarusa kanla lano.”

*Ya alay hēn mihay bawo ya babayi
(Lucas 21:1-4)*

⁴¹ Kaban atsi ya pon ha Templo hi Apo Jesus, hēn ampikno ha êtēb hēn pamyanan alay, ay anhēlkēn nay kal-atan ya ampam-in alay la ha pamyanan alay. Mal-at ya mabandi ya nam-in kal-atan bandi.

⁴² Noa, ya mihay bawo ya babayi, ya mairap, ay nam-in lo-loway sintimos ha pamyanan alay.

⁴³ Kabay wani Apo Jesus kanlan tagahonol na, “Pakagilamēn yo, hata bawo ay nam-in mal-at kanan indin lan kal-atan mabandi.

⁴⁴ Ta hilay kaatag ay nam-in a la pon kailangan, noa, hata bawo, ay in-ubuh nan indin ya panaliw nan maêkan na.”

13

*Inungkat ni Apo Jesus ya pamanira hēn Templo
(Mateo 24:1-2; Lucas 21:5-6)*

¹ Hēn mag-awah hilan Apo Jesus ha Templo, ay wanana miha kanlan tagahonol na, “Mánoro, hēlkēn mo ya pangahlayan bato ya pinaglolog la ha Templo! Hadyay kahampatan na!”

² Amêhēn, hinabi ni Apo Jesus, ya wana, “Lumatêng lanoy allo, ay manga-aagwat ngan ya hata bato ya pinaglolog ya angkahêlêk yo.”

*Ya hadyay pamairap ya lumatêng
(Mateo 24:3-14; Lucas 21:7-19)*

³ Hēn atsi hilan Apo Jesus ha Tawtgug Olibo, hēn nakaikno ya ha êtēb Templo, ay napaidani kana hi

Pedro, hi Santiago, hi Juan, haka hi Andres, hên hilan bêngat.

⁴ Amêhén, nangotang hila kana, “Habién mo kannaén no makanon malyari ya habayto, haka no ay-êmén naén mamwangan no maranin malyari ya habayto.”

⁵ Kabay wani Apo Jesus, “Kaillag kaw, ta êmén a kaw maloko,

⁶ ta mal-at ya maghabin êmén di, ‘Hiko ya Mesias, ya Cristo, ya impangakon Mámiligtas ya pinili ni Apo Namalyari hên mamaala.’ Gawan bayro, ay mal-at ya maloko la.

⁷ Paan kaw malimo ha magilaman yoy tungkol ha manigulo-gulo haka pa-tsian, ta habayto ay kailangan lumatêng pon, noa, a pon tambêng lumatêng ya anggaan hên luta.

⁸ Milalaban hilay bansa haka hilay angkalokopan hên mihay bansa ay milalaban ha kabansa la. Lumatêng ya mangakhaw ya layon ha ay-iri man ya legal. Lumatêng êt ya hadyay lonoh. Noa, habayto ay umpisan bêngat hên hadyay kairapan, hên nanad ha umpisan pan-umilab hên ampanganak.

⁹ “Dapat kaillag kaw, ta gêtan la kaw kanlan toa ya nag tungkulon ha hinon sinagoga, kotangén la kaw haka pagpapatokén la kaw ha sinagoga. Gawan ha paniwala yo kangko, ay gêtan kaw kanlan ari haka gobernador. Ha êmbayro ay maipamwang yo kanla ya Mangêd ya Habi tungkol kangko.

¹⁰ Yabay ya kailangan hên ipamwang ha balang bansa bayo lumatêng ya kaanggaan hên hata luta.

¹¹ Uston iarap la kaw kanlan manungkulan, ta kotangên la kaw, paan kaw manyagah no hinoy habiên yo, ta ya Espiritu ni Apo Namalyari, ay mamaihip kamoyu no hinoy habiên yo.

¹² Main kapotoh pohêl, haka toa, ya may-upit hêñ kamag-anak la. Main maának ya manalang-hang ha toa la hêñ angga ha ipapatsi la hila.

¹³ Kahêmêkan kaw hêñ kal-atan, gawan ha paniwala yo kangko. Noa, no maihundo yoy paniwala yo kangko, angga ha anggaan biyay yo, agyan ampagdanas kaw hêñ hadyay pamairap, ay madyanan kaw hêñ biyay ya ayn angga.”

*Inungkat ni Apo Jesus ya pamanira ha balayan
Jerusalem*
(*Mateo 24:15-28; Lucas 21:20-24*)

¹⁴ Inhundo ni Apo Jesus ya pamaghabi na, ya wana, “No mahêlêk yoy nay kapaparêng-êy ya hadyay karawakan ya malyari ha Templo ni Apo Namalyari, ay ha allon habayto, ay kailangan muwayun magtago ha babo, ya hilay tagaprobinsyan Judea.” Hikaw ya ampamaha ay pakaintindiên yoy habaytsi!

¹⁵ “Habaytoy allo, no main atsi ha bubungan bali la, ay dapat tampol hilan tumaoy hêñ muwayun lumakat ha babo! Paan hilay nan mangwan pibandian la ha lalêñ bali la!

¹⁶ Paan hilay nan muli ya atsi ha panamnan hêñ mangwan sambra la!

¹⁷ Kanan habayto, ay kaingalo hilay nabuktot haka hilay ampamahoho.

¹⁸ Ihalangin yo, ya a dayi malyari ha panaon hêñ kêbêl, ya habaytoy pammuwayu yo hêñ magtago.

19 Ta di ha luta ay maranasan ya hadyay kairapan, ya ayn kapantag paubat hēn dinyag ni Apo Namalyari ya hata luta, angga amêhēn. Haka ahina maranasan oman ya êmbayroy kairapan.

20 No mabuyot ya habaytoy kairapan, ay ayn nanan mabiyay di ha luta, noa, gawan bat ha ikakangêd lan pinili na hēn mag-in kana, ay tinalagá ni Apo Namalyari hēn paipêkêñ ya habaytoy panaon.

21 “Kanan habaytoy panaon, no main maghabin, ‘Atsi ya bayri ya Mesias, ya Cristo, ya Mámiligtas, o atsi ya bayro,’ ay paan kaw maniwala kanla.

22 Ta main magbabara hēn hila ay Cristo, haka main êt kaatag ya magbabara hēn hila ay mámipamwang hēn an-ipaihip kanla ni Apo Namalyari. Mamipahlék hilan kapapaêpapah ta labay lan mámungaw hilay pinili ni Apo Namalyari hēn mag-in kana.

23 Kabay kaillag kaw! In-ubuh kinan hinabi ya malyari, ta êmén a kaw mámungaw.”

Ya pamanlumatêng oman ni Apo Jesus ya Taga-Langit, ya In-anak Tawo

(Mateo 24:29-31; Lucas 21:25-28)

24 Wana êt ni Apo Jesus, “Pangayarin habaytoy hadyay kairapan, ay dumiglêm ya allo, haka ahina humawang ya buwan,

25 mangatata ya bêtêwên, haka maubuh hēn mangayêgyêg ya angkahêlêk ha langit.

26 Kanan habayto, ay mahêlêk la ko ha lêmm, ya Taga-Langit, ya In-anak Tawo, ya anlumatêng hēn kalamoy kapangyarihan ko, ya ayn kapantag,

haka ya kapahilêw ya kahampatan hên pangadiyos ko.

²⁷ Kanan habayto, ay iutoh ko hilay anghel ha kaganawan bansa ha boon luta, ta êmén la tsiponêñ ya pinili ni Apo Namalyari hên mag-in kana.”

*Ya toro ya makwa ha poon kayon igos
(Mateo 24:32-35; Lucas 21:29-33)*

²⁸ Bayo wani Apo Jesus, “Mangwa kaw hên aral di ha poon kayon igos. No mamayo yan bulong, ay muwang yoy na bayto ya marani yanay kaingitan.

²⁹ Embayro êt, no mahêlêk yoy nan maubuh hên malyari ya habayto ya kapapalimo, ay mamwan-gan yoy taganán marani ya pamag-orong ko.

³⁰ Pakgilamêñ yo. Maubuh hên matupad ya habayto kaban main pon di ha luta hên kapareho yon Israelita.

³¹ Ya luta haka ya angkahêlêk ha langit ay main anggaan, noa, ya habi ko ay ayn anggaan.”

*Ayn ampakamwang no makanoy pag-orong ni Apo Jesus
(Mateo 24:36-44)*

³² Wanay na êt ni Apo Jesus, “Ayn ampakamwang no hinon allo, o oras ya pag-orong ko. Hila man ya anghel ha langit, o hiko man ya Anak ni Apo Namalyari, ay a ampakamwang hên habayto. Hiyan bat hi Apo Namalyari ya Tatang tamo, ya nag muwang.

³³ Kabay pakaalisto kaw! Dapat panay kaw nakal-an, ta a yon muwang no makanon malyari ya habayto.”

³⁴ Impamwang ni Apo Jesus kanla, no ay-êmên ya dapat mag-in pamimiyay la, kaban an-êngganan lay pag-orong na, ta wana, “Habaytoy nanad ha mihay lalaki, ya nilumagay ha marayo. Bayo ya nammita ay binaêg nay ipoh na, ta dinyanan hilan tsi-tsihan obra la, haka hinabi na ha magbantay hêñ ilwangan, ya dapat yan panay nakal-an ha pag-orong na.

³⁵ Kabay pakaalisto kaw! Dapat panay kaw nakal-an, ta a yo muwang no makano ya pag-orong nan main bali. A yo man muwang no kapiyabi, bonak yabi, magdadali allo, o maranon ya pag-orong na.

³⁶ Ta kayno malatngan na kaw ya angkabêlêw ha bigla nan pamanlumatêng.

³⁷ Ya anhabiên ko kamoyu, ay anhabiên ko ha balang miha, ya dapat panay kaw nakal-an! Pakaalisto kaw!”

14

*Ya pamamulong kan Apo Jesus
(Mateo 26:1-5; Lucas 22:1-2; Juan 11:45-53)*

¹ Amêhêñ, lowa tanay allo bayo mag Pistan Pangaligtas ha Egipto* haka Pistan Puto ya ayn Pam-paalsa. Hilay mánoron Kautuhan ni apo Moises, haka hilay ampamaala kanlan pari, ay ampamulong kan Apo Jesus, no ay-êmên la yan madakêp haka maipapatsi hêñ ayn makamwang.

² Ta wanla, “Paan tamo yan ipapatsi kaban pista pon, ta kayno manulhul hilay kal-atan, ya am-panggilam toro na.”

* **14:1** Paskwa. Hêlkên ha panlêkan labay habiên hêñ habi di ha bokotan hêñ hata Bibliya.

*Hêñ tinugtugan hêñ pabango hi Apo Jesus
(Mateo 26:6-13; Juan 12:1-8)*

³ Hêñ atsi hilan Apo Jesus ha baryon Betania, hêñ ampangan ha bali ni Simon, ya inalihan ketong, ay main nilumatêng ya mihay babayi, ya ampantan hêñ makamal ya pabango, ya nardo, ya atsi ha pamyanan ya dyag ha alabastro, ta intugtug na ha ulo ni Apo Jesus.

⁴ Hêñ nahêlêk lan kaatag ya dinyag nan babayi, ay nanuluk hila, ya wanla, “Pata hinayang nay pabango?

⁵ Pata a ya inhaliw ya habaytoy pabango, ya ampag-alaga[†] hêñ suweldo hêñ mihay katawo ha mihay taon, ta indin dayi ha mangairap ya habaytoy pera?” Bayo hinuluk la ya.

⁶ Noa, wani Apo Jesus kanla, “Pata an-abalaén yo ya! Paulayan yo ya, ta ya dinyag na, ay taganán mangêd.

⁷ Hilay mairap ay panay yon kalamo, kabay ha hinon oras, ay mahawpan yo hila, noa, hiko ay a yon panay hêñ mapagkalamo.

⁸ Dinyag nay agyu nan daygên. Ha pamitugtug nan pabango kangko, ay nanad nay nan in-il-an ya lawini ko ha pamilbêng kangko no matsu kina.

⁹ Pakagilamên yo, ay-iri man ya legal bayri ha boon luta hêñ ipamwang ya Mangêd ya Habi, ay ungkatêñ etaman ya dinyag na, ta êmêñ ya a malawaan.”

*In-upit ni Judas Iscariote hi Apo Jesus
(Mateo 26:14-16; Lucas 22:3-6)*

[†] **14:5** 300 denaryo ha habin Griego.

10 Bayo nammita yay na hi Judas Iscariote, ya miha kanlan labinloway tagahonol ni Apo Jesus, ta êmêna na ya mai-upit kanlan poon pari.

11 Hinumigla hila etaman ha pay-upit ni Judas kan Apo Jesus kanla, haka nangako hila ya dyanan la yan pera. Paubat hên habayto, ay ampangihip yay na hi Judas no ay-êmêna na yan maidin ha gamêt la.

*Hi Apo Jesus ay namipal-an hên pangkaên la ha
Pistan Pangaligtas ha Egipto*

(*Mateo 26:17-25; Lucas 22:7-13, 21-23; Juan 13:21-30*)

12 Ha unan allon Pistan Puto ya ayn Pampaalsa ya allon pamatsi lan Israelita hên anak tupu, ya kênaêna la hên habayton yabi ha Pistan Pangaligtas ha Egipto, ay kinotang ya hi Apo Jesus, hên labinloway tagahonol na, ya wanla, “Atoy labay moy logal ya pangil-anan naêna hên pangkaên tamo amêhêna yabi ha Pistan Pangaligtas?”

13 Kabay in-utoh ni Apo Jesus ya loway tagahonol na, ya wana kanla, “Muna kaw ha balayan Jerusalem, pamanlumatêng yo, ay matupa yoy mihay lalaki ya ampantan banga ya nag lanêm. Pakihonolan yo ya ha bali ya howênen na,

14 ta habiêna yo ha nag bali, ya êmêna di, ‘Labay nan Mánoro ya itoro mo kannaêna, no antoy kuwarto ya panganan nan kaêna ha Pistan Pangaligtas, hên kalamo na kay ya tagahonol na.’

15 Kabay ipahlêk na kamoyu ya mihay mahlay ya kuwarto ya nakal-an ha tag-ay. Bayro yon il-an ya kaêna tamo ha Pista.”

16 Nammita hilay nay loway tagahonol, haka natupad ya balang hinabi ni Apo Jesus kanla. Kabay in-il-an lay nay kaén ha Pista.

17 Hêñ yabi yana, ay nag-tsipon hilay labinlowa hêñ kalamo la hi Apo Jesus, bayro ha mahlay ya kuwarto.

18 Hêñ ampangan hilay na, ay wana kanla ni Apo Jesus, “Pakgilamêñ yo, miha bayri ha kaaêm tamo, ay mangi-upit kangko.”

19 Namalagêhbêg ya nakêm lan tagahonol na, haka wanlan balang miha kana, “Yarin hiko ya inungkat mo!”

20 Kabay hinabi ni Apo Jesus, “Hiyay miha kamoyun labinlowa. Ya kalamo kon ampamitsil-tsил hêñ puto ha kolo, ay hiya ya mangi-upit kangko.

21 Hiko ya Taga-Langit, ya In-anak Tawo ay taganán matsi hêñ nanad ha impahulat ni Apo Namalyari ha Kahulatan hêñ haton lagi. Noa, taganán kaingalo ya mangi-upit kangko. Mangêd kana, ay a yay na dayin in-anak.”

*Nangan hi Apo Jesus haka hilay labinloway tagahonol na hêñ pangkaén ha Pistan Pangaligtas
(Mateo 26:26-30; Lucas 22:14-20; 1 Corinto 11:23-25)*

22 Kaban ampangan hila, ay nandampot hi Apo Jesus hêñ puto ta impahalamat nay habayto kan Apo Namalyari, haka na pino-potoh, bayo inggawang na kanlan tagahonol na, ta wana, “Habaytsi ya lawini ko, kowên yo ta kaén yo.”

23 Amêhêñ, nandampot yan pamminêman ya nag alak, ta impahalamat nay habayto kan Apo

Namalyari. Bayo inggawang na kanla ta naubuh hilan ninêm.

²⁴ Haka wana, “Habain ay daya ko, ya mamo-ganggang ha pamatawad hên kasalanan hên kaltatan. Yabay ya nanad pinakapirma hên kahundoaan ni Apo Namalyari kanlan pinili na hên mag-in kana.

²⁵ Ta anhabien ko kamoyu, ya a ko pon minêm oman hên alak, angga ha allo hên inumêñ koy bayoy alak ha pamanlokop ni Apo Namalyari.”

²⁶ Hêñ nahabi ni Apo Jesus ya habayto, ay nagkanta hilan pamagpuri kan Apo Namalyari, bayo nilumakat hila ha Tawtgug Olibo.

Impamwang ni Apo Jesus ya habien ni Simon Pedro ya a na ya muwang

(Mateo 26:31-35; Lucas 22:31-34; Juan 13:36-38)

²⁷ Hêñ anlumakat hilay na, ay wani Apo Jesus kanlan tagahonol na, “Laamêhêñ ay lakwanan yo ko, ta impahulat ni Apo Namalyari ha Kahulatan, ya êmêñ di, ‘Patsêñ ko ya pastol, haka mapitatayak hilay nay tupa.’[‡]

²⁸ Noa, ha pangoman kon mabiyay, ay muna ko kamoyu ha probinsyan Galilea.”

²⁹ Bayo wani Pedro, “Lakwanan ka man hêñ kalamo ko, ay a kata lakwanan.”

³⁰ Hinabi ni Apo Jesus, “Pakagilamêñ mo, bayo mangkatsi ya manok hêñ katalwa, amêhêñ yabi, ay katatlo mon habien ya a mo ko muwang.”

³¹ Noa, impalêkpêk ni Pedro, ya wana, “Matsi ko man hêñ kalamo mo, ay a ko habien ya a kata

[‡] 14:27 Zacarias 13:7.

muwang.” Êmbayro êt ya hinabi lan kaatag ya tagahonol na.

Nanalangin hi Apo Jesus ha katanamanan Getsemani ha Tawtgug Olibo

(Mateo 26:36-46; Lucas 22:39-46)

³² Hêñ nilumatêng hilay na ha katanamanan Getsemani, ay wani Apo Jesus kanlan tagahonol na, “Mikno kaw di kaban manalangin ako.”

³³ Bayo pinakilamo ni Apo Jesus hi Pedro, haka hilay loway anak ni Zebedeo, ya hi Santiago haka hi Juan. Bayron nakadanas yan hadyay kalungkutan haka kabyatan.

³⁴ Haka wani Apo Jesus kanla, “A kina agyu ya hadyay kalungkutan ha nakêm ko, ya nanad kinan ikamatsi. Di kaw pon haka paan kaw mabêlêw.”

³⁵ Napaidayo ya kanla hêñ marayo-dayo ta nadoko yan nanalangin, ya no malyari dayi, ay a na ya paulayan ni Apo Namalyari hêñ magdanas hêñ hadyay pamagdusa, ya wana,

³⁶ “Tatang ko ha langit, madyag mo ya hinoman. A mo ko dayin paulayan hêñ magdanas hêñ hatsi ya hadyay pamagdusa ya lumatêng kangko. Êmbayro man, ay alwan kalabayan ko ya mahonol, noa, ya kalabayan mo ya mahonol.”

³⁷ Hêñ nirêng ya, hêñ ubat nanalangin, ay nagorong yay na ha andyanan lan Pedro. Nalatngan na hila hêñ angkabêlêw. Pinukaw na hi Simon Pedro, ya wana, “Simon, pata angkabêlêw ka? A ka man makapagpuyat hêñ agyan miha man ya oras?

³⁸ Paan yon pakilakwan ya bêlêw. Manalangin kaw, ta êmêñ kaw a mahambut hêñ tukso no

ansubukêñ ya paniwala yo kangko. Nakal-an ya nakêm yo hêñ humonol, noa, a yo agyu.”

39 Nag-orong yan oman hi Apo Jesus ha pinanalanginan na, hêñ inhalangin oman, ya inhalangin nay na.

40 Hêñ inorong na hilan oman ya tatlo, ay angk-abêlêw hilay na êt, gawan a la matêêh hêñ mag-puyat. Hêñ nimata hila, ay ayn hilan maihabi kan Apo Jesus gawan dêng-êy la.

41 Hêñ katatlo na hilan inorong, ay wana kanla, “Angkabêlêw kaw pon êt hêñ ampagpainawa! Hukad ya! Ta nilumatêng ya oras ya hiko ya Taga-Langit, ya In-anak Tawo, ay i-upit kanlan makasaranan!

42 Mita kitamina, ta anlumatêng ya mangi-upit kangko. Tupaêñ tamo ya!”

Ya pamandakêp kan Apo Jesus

(Mateo 26:47-56; Lucas 22:47-53; Juan 18:3-12)

43 Kaban ampaghabi ya pon hi Apo Jesus, ay main nilumatêng, ya kal-atan ya ampangamat kan Judas Iscariote ya miha kanlan labinloway tagahonol na. Hilay kal-atan ya nipag-almas hêñ êetak haka pamatok, ay in-utoh lan mânoron Kautuhan ni apo Moises, haka kanlan toa ya nag tungkulon ha bansa, haka kanlan ampamaala kanlan pari.

44 Hi Judas ay nam-i kanla hêñ palatandaan, ya no hinoy aroêñ na, ay yabay ya dakpêñ lan gêtan hêñ pakabantayan.

45 Tampol nilako ni Judas, hi Apo Jesus hêñ kinumusta hêñ main lamoy pamangaro.

46 Dinawhong la ya hi Apo Jesus hêñ dinakêp.

47 Noa, bat nanigpah ya miha kanlan tagahonol ni Apo Jesus, hēn tēkk hēn mihay ipoh hēn pinakapoon pari.

48 Amêhēn, wani Apo Jesus kanlan ampiandanakêp kana, “Andakpēn yo ko hēn main kalamoy êtak haka pammatok hēn nanad pandakêp ha mpanyag karawakan.

49 Allo-allo atsi ko bahēn kamoyu hēn nanoro ha Templo, unin a yo ko dinakêp. Noa, dapat matupad ya Kahulatan ya impahulat ni Apo Namalyari.”

50 Bayo naubuh la yan nilakwanan hēn tagahonol na hēn nipamwayu.

51 Amêhēn, main mihay miyawhay ya nangamat kanlan Apo Jesus, ya nakatapih hēn ayn panlalê. Dinakêp la yan nandakêp kan Apo Jesus,

52 noa, ha pamag-ulabtoh na, ay nabalagan na ya pinagtapih na, kabay nakalaboh ya tanan nuwayu.

Hi Apo Jesus ay in-arap ha Sanedrin

(Mateo 26:57-68; Lucas 22:54-55, 63-71; Juan 18:13-14, 19-24)

53 Gintan la hi Apo Jesus ha balin pinakapoon pari. Ta bayro hilan ni-tsi-tsipon hilay mánoron Kautuhan ni apo Moises, hilay toa ya nag tungkul-an ha bansa, haka hilay ampamaala kanlan pari.

54 Hi Pedro ay nangamat kanla ha marayo-dayo angga ha lote hēn bali nan pinakapoon pari. Bayro yan nakiikno kanlan bantay ya ampanêngêy.

55 Hilay ampamaala kanlan pari haka ya boon Sanedrin, ay ampanapol hēn maibara la kan Apo

Jesus, ta êmêñ la ya maipapatsi. Noa, ayn hilan matapol.

⁵⁶ Mal-at ya bat hêñ ampanistigos ya alwan pêtêg hêñ tungkol kan Apo Jesus, noa, alwan akma ya panhabiên la.

⁵⁷ Bayo main ungnoy nirêng ya naghabin alwan pêtêg, ya wanla,

⁵⁸ “Nagilam naêñ ya hinabi na ya hiraêñ nay Templo ya dinyag tawo, ta ha tatloy allo, ay may-pairêng yan kaatag ya Templo ya alwan dyag tawo.”

⁵⁹ Noa, alwa êt akma ya hinabi la.

⁶⁰ Amêhêñ, nirêng ya pinakapoon pari la ha arapan lan kal-atan, ta kinotang na hi Apo Jesus, ya wana, “Hino ya mahabi mo ha an-ibara la kamo? Pata a ka maghabi?”

⁶¹ Noa, minghan man, ay a ya naghabi hi Apo Jesus. Wanay na êt hêñ pinakapoon pari kana, “Habiên mo kannaêñ no hika ya Mesias, ya Cristo, ya impangakon Mámilitgas, ya Anak ni Apo Namalyari.”

⁶² Wana etaman ni Apo Jesus, “Awo, pêtêg ya hinabi mo. Haka lano, ay mahêlêk yo ko, ya Taga-Langit, ya In-anak Tawo, hêñ nakaikno ha dapit panabtab ni Apo Namalyari ya Makapangyarihan. Haka ha pag-orong kon ubat ha langit, ay mahêlêk yo ko ha lêmm ya anlumatêng.”

⁶³ Gawan huluk nan pinakapoon pari, ay ginihi nay sarili nan takop, ta wana, “A tamina kailangan hêñ kaatag ya tistigos, ta nagilam tamina man ya hinabi na.

⁶⁴ Nagilam yoy nay pamipantag nan sarili na kan Apo Namalyari! Yarin a nan ammusmusêñ

hi Apo Namalyari ya tawo yan bêngat! Hino ya labay yon daygên kana?” Naubuh hilan naghabi ya dapat yan patsên.

⁶⁵ Hi Apo Jesus ay dinul-an haka pinagtutumbuk. Tinagpênan lay mata na, bayo wanla, “Habiên mo no hinoy nanumbuk kamo!” Pinag-tatampaling la ya êt hêñ ampipagbantay kana.

Katatlo nan hinabi ni Pedro ya a na balay hi Apo Jesus

(Mateo 26:69-75; Lucas 22:56-62; Juan 18:15-18, 25-27)

⁶⁶ Kaban atsi ya hi Pedro hêñ nakiikno hêñ kalamo lan bantay ya ampanêngêy, ay napansin yan babayi ya mihay ipoh hêñ pinakapoon pari.

⁶⁷ Pinuliah na ya, ta wana, “Hika ay kalamo êt ni Jesus ya taga-Nazaret.”

⁶⁸ Noa, hinabi ni Pedro, ya wana, “Alwa. A ko muwang ya anhabiên mo.” Bayo nagdayo yan pêrad ha apoy hêñ dinumani ha pag-awahan. Kanan habayto ay nangkatsi ya mihay manok.

⁶⁹ A nabuyot ay napansin yay na êt hi Pedro, hêñ habaytoy ipoh ya babayi, ya wana kanlan lalaki ya atsi bayro, “Habain ya lalaki, ay miha ya êt kanla!”

⁷⁰ Noa, nagpuglaoh yay na êt hi Pedro. Hêñ a nabuyot, ay wanlan karani ni Pedro kana, “Sigradon hika ya kalamo ni Jesus, gawan taga-Galilea ka êt.”

⁷¹ Noa, hinabi ni Pedro, ya wana, “Alwa! Matsi ko man, ay taganán a ko ya muwang ya habain!”

⁷² Kaban ampaghabí ya pon, ay nangkatsi yay na êt ya manok. Bayo naihipan ni Pedro ya hinabi kana ni Apo Jesus, ya wana, “Bayo mangkatsi ya

manok hēn katalwa, ay katatlo mon habiēn, ya a mo ko muwang.” Kabay inumawah ya hi Pedro hēn hadyay tangih na.

15

*Hi Apo Jesus ay in-arap kan Gobernador Pilato
(Mateo 27:1-2, 11-14; Lucas 23:1-5; Juan 18:28-38)*

¹ Dali allo, ay nagkamiha ya Sanedrin, ya angkaboo hēn toa ya nag tungkulon ha bansa, hilay ampanoro hēn Kautuhan ni apo Moises, haka hilay ampamaala kanlan pari, hēn gētan la hi Apo Jesus kan Gobernador Pilato. Kabay ginapoh la yan gintan kana.

² Amêhēn, kinotang ni Gobernador Pilato hi Apo Jesus, ya wana, “Awta? Hika ya ari hēn Israelita?” Hinabi etaman ni Apo Jesus, “Hinabi mina, Gobernador.”

³ Mal-at ya an-ibara la kan Apo Jesus hēn hilay ampamaala kanlan pari. Noa, a ya naghabi hi Apo Jesus.

⁴ Wanay na êt ni Gobernador Pilato kan Apo Jesus, “Awta a mon pakibatan ya an-ibara la kamo? A mo angkagilaman ya kal-atan an-ibara la kamo?”

⁵ Noa, a ya naghabi hi Apo Jesus. Kabay nag-épapah hi Gobernador Pilato.

*Hi Apo Jesus ay hinatolan hēn matsi ha koros
(Mateo 27:15-26; Lucas 23:13-25; Juan 18:39--19:16)*

6 Main kaugalian, ha balang Pistan Pangaligtas ha Egipto,* ya an-ibuhan nan gobernador ya mihay nakahukul ya ampilién lan kal-atan.

7 Kanan habayto, ay nakahukul ya mihay lalaki ya nag langan Barrabas, gawan nakilamo ya kanlan nanalanghang ha gobyernon Roma, haka gawan namatsi yan tawo.

8 Dinumani hilay kal-atan kan Gobernador Pilato hên nakihabi kana ya honolên nay kaugalian, ya ha Pistan Pangaligtas, ay ibuhan nay mihay nakahukul.

9 Kabay wana kanla, “Labay yon ibuhan ko hi Jesus, ya Ari yon Israelita?”

10 Ta muwang ni Gobernador Pilato ya hi Apo Jesus, ay gintan lan ampamaala kanlan pari kana, gawan angkahêman la ya.

11 Noa, hilay ampamaala kanlan pari, ay nanul-hul hên kal-atan ya pakikwaan la kan Gobernador Pilato ya ibuhan na hi Barrabas.

12 Kabay kinotang na hila ni Gobernador Pilato, “Hino awud ya labay yon daygên ko kan Jesus ya ambaégen yon Ari yon Israelita?”

13 Kabay in-angaw la, “Ipako ya ha koros!”

14 Bayo kinotang ni Gobernador Pilato, “Awta? Hinoy kasalanan na?” Noa, impapakaangaw lay na êt, “Ipako ya ha koros!”

15 Hinonol nay kalabayan lan kal-atan, ta imbuhan na hi Barrabas. Impadapi na hi Apo Jesus, haka indin na ya kanla, ta êmén la ya ipapako ha koros.

* **15:6** Paskwa. Hêlkên ha panlêkan labay habiên hên habi di ha bokotan hên hata Bibliya.

*Hi Apo Jesus ay minusmus hên hundaloh
(Mateo 27:27-31; Juan 19:2-3)*

¹⁶ Hi Apo Jesus ay gintan lan hundaloh ha lalên balin gobernador, haka inubuh lan tsinipon ya kal-atan kapareho lan hundaloh.

¹⁷ Ha pammusmus la kana, ay pinatakopan la ya hên mahampat ya takop, ya nanad ha takop lan ari. Bayo nangwa hilan nanad tanyuong, ya pinanyag la yan korona, ya impakopya la ha ulo na.

¹⁸ Haka in-angaw ya êmên di, “Kumara dayi ya biyay hên Ari lan Israelita!”

¹⁹ Pinagpapatok lay ulo na hên tambo, haka la ya pinagdu-dul-an. Nandoko hila ha arapan na ha pamanggalang la waringan kana.

²⁰ Pamakayari la yan minusmus, ay inalíh lay takop ari ya impatakop la kana, ta impatakop la kanan oman ya takop na. Bayo gintan la yay na, ta ipako la ya ha koros.

*Hi Apo Jesus ay impako ha koros
(Mateo 27:32-44; Lucas 23:26-43; Juan 19:17-27)*

²¹ Ha pammita lan hundaloh hên anggêtan hi Apo Jesus, hên ipako ha koros, ay natupa la ya tatang ni Alejandro haka ni Rufo, ya hi Simon ya taga-Cirene, ya ampamuli ha balayan. Dinakêp la ya ta impabalangaw kana ya koros ya paypakoan la kan Apo Jesus.

²² Inhundo lay pammita la, hên angga ha nilumatêng hila ha legal ya ambaêgên Golgota o Bungo.

23 Painêmên la ya dayin alak, ya dyag ha habaw ubas, ya naglamo hêñ tambal ilab ya nag langan mira, noa, a na ininêm.

24 Amêhêñ, impako la yay na bayro ha koros. Bayo pinagpalabonutan lay takop na, ta êmên la mamwangan no hino kanla ya makakwa.

25 Alas nuwebe hêñ habayto, hêñ matag-ay ya allo, hêñ impako la hi Apo Jesus.

26 Bayro ha koros, ha ugton ulo na, ay nakahulat ya imbara la kana, “Hatsi ya Ari lan Israelita.”

27 Main êt loway lalaki, ya parehon mapanyag karawakan ya impako ha koros. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki ni Apo Jesus.

28 Ha dinyag la kan Apo Jesus, ay natupad ya impahulat ni Apo Namalyari ha Kahulatan ya wanan hulat, “Intad la yan mapanyag karawakan.”[†]

29 Minusmus la yan anlumabah hêñ main lamoy pamaméyêng, ya wanla, “Hika awud ya labay maniran Templo ni Apo Namalyari, ta ipairêng mon oman ha tatloy allo!

30 Munaoy kan ubat ha koros hêñ iligtas moy sarili mo!”

31 Embayro êt ya pammusmus la kana hêñ hilay mánoron Kautuhan ni apo Moises haka hilay am-pamaala kanlan pari, ya wanla ha miha ta miha, “Inligtas nay kaatag, pata a na mailigtas ya sarili na!

32 No tumaoy yan ubat ha koros, habain ya Mesias, ya Cristo, ya Ari tamon Israelita, ay maniwala kitamo kana!” Minusmus ya êt, hêñ hilay

[†] **15:28** Isaias 53:12.

mapanyag karawakan ya nakapako hēn kalamo na.

Ya pangamatsi ni Apo Jesus

(*Mateo 27:45-56; Lucas 23:44-49; Juan 19:28-30*)

33 Hēn ugtoy nay allo, ay dinumiglēm ya boon luta angga ha alas tres hēn maapon.

34 Hēn alas tres hēn maapon, ay impakaang-gaw ni Apo Jesus, ya wana, “Eloi, Eloi, lema sabachthani?” ya labay habiēn, “Diyos ko, Apo Namalyari, pata nilakwanan mo ko?”

35 Hēn nagilam lan kaatag ya nakairēng bayro ya in-angaw na, ay êndat lan ambaêgêna hi Propeta Elias, kabay wanla, “Gilamén yo! Ambaêgêna hi Elias!”

36 Nuwayu ya miha kanla hēn namiptēh hēn nanad bolak ha mihay hanga, ta indêrê na ha nangihoy alak, ya dyag ha habaw ubas, ta painêmén na ya hi Apo Jesus. Bayo wana, “Paulayan tamo ya raw. Hêlkên tamo no iligtas ya ni Elias!”

37 Amêhêñ, nan-angaw hi Apo Jesus hēn hadyay hêkaw, bayo natsi yay na.

38 Ya makugpa ya takop ya pinagpênlan bayro ha lalê hēn Templo ha Jerusalem, ay biglan nawak-wak hēn napibonak paubat ha babo angga ha aypa.

39 Hēn nahêlêk nay pangamatsi ni Apo Jesus hēn ampamaala kanlan hundaloh, ya atsi ha êtêb na, ay pinuri na hi Apo Namalyari, ya wana, “Pêtêg bay awud! Hiyay Anak ni Apo Namalyari!”

40 Main babayi bayro ya ampandungaw ha angkalyari. Kalamo la hi Maria Magdalena, hi

Salome haka, hi Maria ya indo ni Jose boy hi Santiago ya ambaêgên Ali.

41 Hilay habaytoy babayi ay kalamo lan Apo Jesus hên nanaglap kanla paubat hên atsi hila pon ha probinsyan Galilea. Main pon êt hên kal-atan babayi bayro, ya kala-kalamo la hên angga ha Jerusalem.

Ya pamilbêng kan Apo Jesus

(Mateo 27:57-61; Lucas 23:50-56; Juan 19:38-42)

42 Hên ampinaboy nay allo, haka gawan ha kaugalian la, ya dapat milbêng ya natsi, hên bayo matata ya allo ha Biyernes, ya allon pamaglêan la para ha allon pamagsimba la,

43 ay makhaw ya nakêm hên nakiarap kan Gobernador Pilato, ya miha kanlan taga-balayan Arimatea, ya nag langan Jose. Hi Jose, ay miha kanlan kalamo ha Sanedrin, ya anggalangê hên kapareho na, ya ampangênggan ha pamanlumatêng hên pamanlokop ni Apo Namalyari. Pinakihabi nay bangkay ni Apo Jesus, ta iilbêng na dayi.

44 Nag-êpapah hi Gobernador Pilato hên nagilam na ya natsi yay na hi Apo Jesus. Kabay impabaêg nay ampamaala kanlan hundaloh, ta labay nan mamwangan no pêtêg yay nan natsi hi Apo Jesus.

45 Hên namwangan na ha ampamaala kanlan hundaloh ya pêtêg yay nan natsi hi Apo Jesus, ay nabay yay na etaman. Kabay impaulay nay na kan Jose ya bangkay ni Apo Jesus.

46 Nanaliw hi Jose hên makarang ya takop ya naputsi ya pinangêlkêl na hên bangkay ni Apo Jesus hên naiaypa nay na. Bayo inhowêna ya ha bayoy dinyag ya pay-ilbêngan ya lêyang. Pangayari, ay

intulid nay hadyay hêlay bato hên panakap na ha bêbêy pinay-ilbêngan.

⁴⁷ Hi Maria Magdalena haka hi Maria, ya indo ni Jose ay nakahêlêk hên pamilbêng la kan Apo Jesus.

16

*Hi Apo Jesus ay nabiyay oman
(Mateo 28:1-8; Lucas 24:1-12; Juan 20:1-10)*

¹ Hêñ yabin Sabado, hêñ nayari ya allon pamsimba la, ay nanaliw hêñ pabango, hi Salome, hi Maria Magdalena, haka Maria ya indo ni Jose haka hi Santiago, ta habaytoy pabango, ay itugtug la dayi ha bangkay ni Apo Jesus ha humonoy maranon.

² Dali allo êt hêñ allon Dominggo, ay nagtagloh hilay nay babayi ha pinay-ilbêngan, kabay hêñ nilumatêng hila, ay an-umawah ya allo.

³ Kaban atsi hila ha dann, ay nihahabi hila no hino ya mapakihabian la hêñ itulid ya bato ha bêbêy hêñ pinay-ilbêngan kana ta êmêñ hila makahowêñ.

⁴ Noa, hêñ hinlêk la, ay napansin la ya naitulid ya habaytoy hadyay hêlay bato.

⁵ Hêñ hinumwêñ hila ha pinay-ilbêngan, ay nahêlêk lay mihay miyawhay ya nakatakop hêñ naputsi ya nakaikno ha dapit panabtab, kabay hadyay limo lan babayi.

⁶ Noa, wana kanla, “Paan kaw malimo! Antapolêñ yo hi Apo Jesus, ya taga-Nazaret ya impako ha koros. Nabiyyay yan oman! Ayn ya di. Hêlkêñ yoy habaytsi ya pinaybul-ihan kana.

⁷ Mag-orong kaw, ta habiêñ yo kan Pedro haka kanlan kaatag ya tagahonol na, ya hi Apo Jesus

ay nangoman nabiyay, haka muna yay na kanla ha probinsyan Galilea hên nanad ha hinabi na kanla.”

⁸ Inumawah hila ha pinay-ilbêngan hên am-pamêgpêg, haka pinarah lan nuwayun nagtagloh kanlan tagahonol. Gawan ha limo la, ay a la inhabi ya nalyari ha hinoman ya atsi ha dann.

*Nagpahlék hi Apo Jesus kan Maria Magdalena
(Mateo 28:9-10; Juan 20:11-18)*

⁹ [Hêñ habayto êt hêñ allon Dominggo, hêñ nabiyay yan oman hi Apo Jesus, ya una nan pinapahlékan, ay hi Maria Magdalena, ya inalihan na hêñ hato hêñ pitoy narawak ya a angkahêlék ya hinumapat kana.

¹⁰⁻¹¹ Nagtagloh hi Maria Magdalena kanlan tagahonol ni Apo Jesus ya nalatêng nan ampa-malagêhbêg ya nakêm haka ampipanangih, ta hinabi na kanla ya nabiyay yan oman hi Apo Jesus haka nahêlék na ya. Noa, a hila naniwala ha hinabi na.

*Nagpahlék hi Apo Jesus kanlan loway tagahonol na
(Lucas 24:13-35)*

¹² Panga-ubat hêñ habayto, ay nagpahlék hi Apo Jesus kanlan loway tagahonol na, ya atsi ha dann hêñ palako ha mihay baryo, noa, kaatag ya itsura na.

¹³ Tampol hilan nag-orong ha Jerusalem ta imbalita la kanlan kapareho lan tagahonol, ya nahêlék la hi Apo Jesus, noa, a hila pinaniwal-an.

*Nagpahlêk hi Apo Jesus kanlan labinmihay tagahonol na
 (Mateo 28:16-20; Lucas 24:36-49; Juan 20:19-23;
 Dyag 1:6-8)*

¹⁴ Bayo nagpahlêk ya hi Apo Jesus kanlan labinmihay tagahonol na, kaban ampangan hila. Hinabyanan na hila, gawan kulang ya paniwala la kana, haka kakdêyan ulo la, ya a hila naniwala ha balita lan nakahêlêk kana ya hiyay nabiyay oman.

¹⁵ Wana kanla, “Ipamwang yo ha boon luta ya Mangêd ya Habi tungkol kangko.

¹⁶ Hilay maniwala ha Mangêd ya Habi, haka pabawtismo, ay miligtas ha kaparusaan hên kasalanan la. Noa, hilay a maniwala ay parusaan ni Apo Namalyari.

¹⁷ Hilay ampaniwala kangko, ay madyanan ni Apo Namalyari hên kapangyarihan hên manyag kapapaêpapah, hên nanad ha mamaalíh hên nangarawak ya a angkahêlêk, gawan ampanggamit hilan langan ko, haka maghabi hila ha bayoy habi ya a la pinag-aralan.

¹⁸ Makatalan hila man hên utan ya makamatsi, o makainêm man hên hinon makamatsi, ay ayn malyari kanla. No ipalunto lay gamêt la, hên ihalangin hilay nipaghakit, ay maalíh ya hakit la.”

*Hi Apo Jesus ay nag-orong ha langit
 (Lucas 24:50-53; Dyag 1:9-11)*

¹⁹ Hêñ nahabi nay na ya habayto ni Panginoon Jesus, kaban anhêlkên la ya, ay antumag-ay yay na hêñ palako ha langit, haka ya nikno ha dapit panabtab ni Apo Namalyari.

20 Hilay tagahonol na ay nipammitay na ha ayri man ya legal, hēn naypamwang hēn Mangēd ya Habi tungkol kana. Hi Panginoon Jesus ay ampamaptēg ha pamanoro la, gawan habaytoy kapapaêpapah ya angkadyag la ha kapangyarihan na.]

**Ya habi ni apo namalyari: Bayon tsipan - Ayta
Mag-antsi
New Testament in Ayta, Mag-antsi**

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

XCV

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

d2289d90-e8af-5f04-a1e1-312fd0921aff